

# प्रजापति गौतमी



भिक्षु अमृतानन्द



“सबबदानं धम्मदानं जीनाति”

# प्रजापति गौतमी महारानी

लेखक—

भिक्षु अमृतानन्द  
आनन्दकुटि  
कान्तिपुर  
नेपाल ।

प्रकाशिका :-

आशामाया उपासिका

Dhamma कार्यपि Digital

बाबुकाजी शाक्य

हेराकाजी शाक्य

नागवहाल कुटिवहा, यल ।

द्वितीयावृत्ति १००० }

बु० सं० २५२३

ने० सं० १०९९

# धलपौ

विषय	पील्या	विषय	पील्या
सहायक ग्रंथ		दान विशुद्धि	१५
निगू खँ	कै	शुद्धीदन महाराजया देहत्याग	१६
प्रकाशकपिनि पाखें	ग	गृहत्यागया संकल्प	१८
जन्म	२	गृहत्याग	२२
नामकरण	२	प्रन्नज्या लाभ	२४
विवाह मांगल्य	३	शिक्षा प्रेम	३१
सन्तान लाभ	३	घर्मसार	३४
सन्तान पोषण	४	न्यासल भिक्षुणीपित उपदेश	३७
पुत्र-शोक	४	अग्रस्थान	४३
बुद्ध दर्शन	६	कृतज्ञता	४४
चीवर-वस्त्र दान	६	परिनिर्वाण संकल्प	४५
भिक्षुता व्यक्तिगत दान	१२	परिनिर्वाण	५३
न्हेता संघ दान	१४		

## सहायक ग्रंथ

१—अंगुत्तर निकाय	११—मनोरथ पूरणी
२—मज्झिम निकाय	१२—समन्तपासादिका
३—सुत्तनिपात	१३—परमत्थ जोतिका
४—महावंश	१४—परमत्थ दीपनी
५—चुल्लवमा पालि	१५—बुद्ध चरित्र
६—पाचित्तिय पालि	१६—बुद्धचर्या
७—घम्मपदट्टकथा	१७—विनय पिटक
८—जातकट्टकथा	१८—गौतम बुद्ध
९—थेरीगाथा	१९—बुद्ध जीवनी
१०—थेरी अपदान	२०—पालि संज्ञा शब्दकोष

## निगू शब्द

प्रस्तुत “प्रजापति गौतमी” सफू पूज्य अमृतानन्द महास्थविरं च्वया बिज्यागु सफू खः । थ्व सफू न्हापा छापे जूगु फुना आः द्वितीय संस्करणया प्रकाशकपि श्रीमती आशामाया उपासिका व अनया कार्यपि बाबुकाजी शाक्य व हेराकाजी शाक्यपि जुया बिज्यात । श्री मती आशामाया बुद्ध धर्मय् श्रद्धा भक्ति दुह्य खः । उह्य उपासिकायात न्हापां बिहारे ह्यगु लें क्यपि पुतलीं अजि तथा श्री मती लक्ष्मी माया उपासिका नागबाहाःयापि खः । आशा-माया उपासिका भन्तेपिनिथाय् धर्म उपदेश न्यनेगु संगत जुया च्वंगु २६।२७ दँति हे दत । श्री शाक्यसिंह विहार, श्री सुमंगल विहार, मणिमण्डप विहार न्यकभन थ्यना च्वनी । वथें हे गबलें किण्डाल विहार धर्मचारी अनागारिका याथाय् वनी गबलें बौद्धऋषि महा प्रज्ञायाथाय् नं थ्यना च्वनी । भन्ते पिनि संगतयाना बिज्याना च्वगु स्वरूप दान यायगु, शील पालन यायगु, भावना यायगुली श्रद्धा दु । बिशेष याना प्रज्ञानन्द महास्थविरया पाखें उपदेश न्यना बोधजुया बिज्याम्ह खः । आशामाया उपासिका थौं कन्हे ७४ दँति दत, अथेनं घिसि मिसि घासे बल्लानि । “सब्बदानं धम्म दानं जिनाति” धयागु भगवान बुद्धयागु उपदेश अनुसार महापरित्राणया उपलक्षस आशामाया उपासिका व अनया कार्यपि बाबु काजी शाक्य व हिराकाजी शाक्य पिनि प्रजापति गौतमी सफू छापेयाना धर्म दान यायेगु श्रद्धा तथा बिज्यात ।

( ख )

अन्तस आशामाया उपासिका प्रमुख सकल कायपिन्तनं  
थुगु सफू धर्म दान याना बिज्यागुया पृण्यं लौकिक लोकुत्तर  
सम्पतिय। महान् फल लाभ याना काये फयमा धका आशिका  
याना ।

-भिक्षु बुद्धघोष

श्री सुमङ्गल विहार  
ललितपुर  
५ श्रावण २०३६



Dhamma.Digital

# प्रकाशकपिनि पाखें

पूज्य अमृतानन्द महास्थबिरं च्वया विज्यागु “प्रजापति गौतमी” सफू द्वितीय संस्करण प्रकाश याये दया जिपि तस्सकं लयताया च्वना । “सब्बदानं धम्म दानं जिनाति” धका भगवान बुद्धं धम्मपदे आज्ञाजुया विज्यागु अनुसारं थ्व सफू महापरित्राणया उपलक्ष्ये धर्मदान यायगु मती तथा प्रकाश यानागु जुल । नेपाले बुद्ध शासन दिनपर दिन वृद्धि जुजुं वनेमा धका अभिलाषा याना

आशामाया उपासिका

कार्यपि :—

बाबुकाजी शाक्य

हेराकाजी शाक्य

नागबाहा कुतिबाहा

५ श्रावण २०३६



**श्रीमती आशामाया उपासिका**

जन्म ने. सं. १०२५ साल

पौष शुक्ल चतुर्दशी विहिवार ।






**Dhamma.Digital**

नमो तस्स भगवतो अरहतो सम्मासम्बुद्धस्स

# प्रजापति गौतमी



प्रजापति गौतमी षका नां काय्वहे भोगु स्मृति छक्व  
तुरन्तहे न्यीखुसःदं ल्यूने थ्यंकः वने घुंकी । साथ-साथे  
शाक्यकुलया खं लुमंसि वयाः सिद्धार्थं गौतम बुद्धया समेत  
स्मरण उवी घुंकी ।

प्रजापति गौतमी, २६०० दं न्हापाया नारी समाजया  
छम्ह अग्रगामी प्रगतिशीलम्ह नकीं खः । वसपोलं, विशेष-  
यानाः, श्रमण जीवनया लागी गुगु कठोर परिश्रम व प्रयत्न  
याना बिज्यात, उकिया लागी उबलेयापि नारीत जक मखु,  
परन्तु आःयापि नारीत समेत आभारी हे धाय्माः । वसपोलं  
मिसाते लागी तिनातःगु निर्वाणया लुखा-द्वा चाय्का  
बिज्यात । वसपोलं मिसाते लागी दयाच्चगु प्रतिबन्धया  
अंगः तच्छ्याना बिया बिज्यात । 'मिसा मिसाहे खः' धयागु  
सिद्धान्तयात फात्ताप्वीकाः मिजंते ताथले थ्यंकः वनेगु लंपु  
चाय्का बिज्यात । अतएव विश्वया नारीतेसं महाप्रजापति  
गौतमी महारानीया जीवनी सीका, उकि शिक्षा व आदर्श  
कयाः ल्यूने लानाच्चवंगु नारी-समाजयात न्हाणे यंकेगु कुतः

याय्माल ।

### जन्म

महाप्रजापति गौतमी छम्ह भाग्यवती नारी खः । वस-  
पोल, थनि न्यी खुसदं न्हापा, थेरी अपदानया ल्याखं, प्रजा-  
तंत्रवादी शाक्यखलःते देवदह \* नगरे, अञ्जन † शाक्यया  
कुले सुलक्षणा देवीया कोखे जन्म जुल । वसपोलया तता छम्ह  
दु—महामाया देवी । सुप्पबुद्ध ( सुप्रबुद्ध ) व दण्डपाणी ✕  
वसपोलया दाजु-किजापि ।

### नामकरण

ज्योतिषतेसं सामुद्रिक व नक्षत्र-शास्त्रया हिसाबं बिचाः  
याना सोबले, गौतमीया कोखे जन्म ज्वीपि कायमस्त  
चक्रवर्ती जुजु समान ज्वी घका घाल । भिपि तद्ध पि सन्तान  
दय्कीम्ह जूयानिति इमिसं वसपोलयात 'प्रजापति' घका  
नां छुत । 'गौतमी' वसपोलपिनि गोत्रया नां जुल । लिपा-  
जूलिसे वसपोलयात 'महाप्रजापति गौतमी' घयाहल ।

\* देवदह, रोहिणी नदीया पूर्वपाखे वर्तमान नेपालया पश्चिम  
तराई पाखे देविदमाद घयागु गामे ला । बुटौल पाखें केरवानी  
घयागु गामे जुना वनेगु । थोंकन्हे अन भग्नावशेष दु । लुम्बिनी पूर्व-  
पाखे अन्दाजि खुक्वेति दु ।

† थेरीगाथा अट्टकथाय् ( ६-१-६ ) व अंगुत्तर निकायट्टकथाय्  
( १-५-१ ) महासुप्पबुद्धया कुले जन्म जुल घका घयातल । महावंशे  
( २-१८ ) माँ यशोधरा व अबु अञ्जन शाक्य घयातल ।

✕ दीपवंश १८ परिच्छेदे । सुप्पबुद्धया म्हाय् यशोधरा देवी  
सिद्धार्थया पत्नी ।

## विवाह मांगल्य

पालि-साहित्यस गनंहे थ्व खँया स्पष्टिकरण मदुकि प्रजापति गौतमीया विवाह छु बैसे जुल । अर्थकथास थुलि दुकि बैस प्राप्त ज्जी घुंसेलि शुद्धोदन महाराजा महामाया देबी व प्रजापति गौतमीयात विवाह याना यंकल । (सुद्धोदन महाराजा वयप्पत्तकाले ता द्वेपि मंगलं कत्वा अत्तनो घरं आनेसि\* ) अतः महामाया देबी व प्रजापति गौतमीया विवाह, रोहिणी नदीया पश्चिम पाखे च्वंगु कपिलवस्तु नगरेच्वंम्ह प्रजातंत्रवादी शाक्यखलःते नायक शुद्धोदन महाराजा नापं यथोचित बैसे, यथोचित रीतपूर्वक, जूगु जुल ।

## सन्तान लाभ

शुद्धोदन महाराजाया बडामहारानी महामाया देबी व कांछि बडामहारानी प्रजापति गौतमी जुल ।

महामाया देवीया पाखें सिबे न्हापलाक प्रजापति गौतमीया पाखें शुद्धोदन महाराजायात ( सुन्दरी ) नन्दा घयाम्ह म्हाय् छम्ह लाभ जुल । अनलि महामाया देवीया पाखें सिद्धार्थ लाभ जुयाः प्यन्हू लिपा प्रजापति गौतमीयात नन्द कुमार लाभ जुल । थ्व बेलस प्रजापति गौतमीया बैस ४० दँ व शुद्धोदन महाराजाया बैस ५७ दँ दुगु जुल । महामाया देबी सिद्धार्थ कुमार जन्म जुया न्हेनु दुखुनु स्वर्ग-

\* अंगुत्तरनिकायट्टकथा १-५-२

बास जुसेलि प्रजापति गौतमीयात बडामहारानी यात ।

### सन्तान पोषण

यद्यपि प्रजापति गौतमी महारानी सिद्धार्थ कुमारया कांछिमां खः, तथापि मुगु कांछिमांया प्रति लोकजनपिनि मनोभाव दु, उगु मनोभावयात थाय् मब्यूसे वसपोलं सिद्धार्थ कुमारयात, थः वसपोलया 'कांछिमां खः' धयामु सम्मनं विचार याये मफइगु छांटं—स्वपुत्र स्नेह तथाः—भरण पोषण यात । महामाया देवीं न्हेनु दुम्ह सिद्धार्थयात तोताः स्वर्गवास ज्वी घुंसेलि प्रजापति गौतमी महारानीं थःम्ह मचा—बुया स्वन्हूतिनि दुम्ह—नन्द कुमारयात तुतु-मांया ल्हाते लवल्हानाः, स्वयं सिद्धार्थ—न्हासुमचायात मुले तथा दुरू त्वंका बिज्यात । सिद्धार्थ कुमार ल्याय्म्ह जुसेलि वसपोलयात नन्दकुमार स्वया न्हापलाक विवाह याना बिल । सिद्धार्थ कुमारया प्रति वसपोल सकसियां विशेष प्रेमभाव दुगु जुल ।

### पुत्र-शोक

२६ दैया बैसे सिद्धार्थ कुमारं गृह त्याग यानाः तपोवन दंसेलि, महाप्रजापति गौतमी महारानीया चित्त साबहे वेदना जुल । छन्न सारथी अनोमा नदीं, सिद्धार्थ कुमारया वसः पो ज्वनाः, लिहाँ वोसेलि, थः प्रिय पुत्र सिद्धार्थ कुमारया बारे 'गथे जुल, छु जुल ? गन च्वंच्वन, छु याना च्वन ?' धका आपलं प्रश्न यात । छन्न सारथीं थथे बिन्ती यातः—

“भो महारानी, सिद्धार्थं कुमार आषाढ पुन्होयो चायारात्री कण्टक सलम्हे च्वनाः, स्वीगू योजन तापाकक च्वनाः, अनोमा नदीया सीथे ध्वंकः बिज्यात । अन वसपोलं अनोमा नदीया वहचुं थें ज्यागु फी दौने दनाः, थःगु अपाय्-च्वतं बालागु कुलि-कुलिचिगु सँ थःगुहे खड्मं पाचुकक खाना बिज्यात । व बेलस आकाशं सहम्पति धयाम्ह महान्नया वयाः वसपोलयात काषाय वस्त्रं छज्वलं लत्रल्हाना बिल । अन वस्पोलं वहे यइपुसेच्वंगु काषाय वस्त्रधारण यानाः, “हे छन्न, छ राजभवने वनाः जि पूज्य माँ-ब्वापित जिगुपालें सास्तांग प्रणम यानाः जि म्हंकू धका ध्वंकाब्बु” धका धयाः जितः लित छ्वथा हल । वसपोलयात संचहे दु । वसपाल थोंकन्हे अनुप्रिय आन्नवने च्वना बिज्याना च्वन ।”

छन्न सारथीया ख्वखल सलं कंगु समाचार न्यनाः महाप्रजापति गौतमी महारानीया नुगःषा तज्याइथें च्वन । वसपोलं थःगु व्वागु खोभिधाः दिके मफुत । अनेकतरहं विरह यानाः बिलाप यात । महारानीया बिलाप-सः तायाः खोपीच्वंपि केतित, सेवकत व सेवकनित सकलें थात च्वने मफयाः, वसपोलयात तिवा बी थें च्वंक, हुनुनुनुं ख्वसः पिकया हल । अन्तस छुयाय् ! माय्गु उपाय छुं मदुसंलि वसपोलं थः काय्मचा सिद्धार्थया मनारथ याकनहे पूर्ण-ज्वीमाः धका आशिका यानाः, मफु मफु ख्वेगु दिका, थः थम्हंतुं मनयात धैर्य यानाः बिज्यात ।

ख्व जगते काँछिमाँया नामं कलंकित मजूह सु

काँछिर्मा दत्तधाःसा व महाप्रजापति गौतमी महारानीहै  
स्वः । प्रजापति गौतमीया जय !!

### बुद्ध दर्शन

सिद्धार्थ कुमारं राज्य तोता वंसैलि, गौतमी महारानी-  
या मने च्वंगु पुत्र-स्नेह ब्याक्कं छपुचः जुया थः काय्  
राजकुमार नन्दया प्रति आकषित जुल । अयुधका वसपोल-  
यात सिद्धार्थ कुमार लोमनावंगु मखु । ण्हिछक्क ला वसपोल  
महारानी सिद्धार्थया स्वाः लुमंका स्वया विमज्यागु मडु ।  
किन्तु हानं नन्द कुमारया स्वाः स्वया थ.गु मनयात धैर्ययाना  
विज्याई । थुलि तक्कनं धयात.गु दुकि सिद्धार्थया शोकं याना  
वसपोलया मिखा नापं स्यनावन । थुगु प्रकारं वसपोल  
महारानी च्यादंतक कष्टसिया विज्याता । गुबलें गुबलें  
वसपोल याकःचा च्वना च्वनीबले, वसपोलं थथे मतीत्वीका  
विज्याई- “हरे । वमचायात छु पीड जुलका ! थपाय्धगु  
राज्यसम्पत्ति तोता वनेत ! वयात छु ममात का ! याकनहे  
वया मनोरथ पूर्णं जुया जितः स्वाः कयों वय्मा !!”

शुद्धोदन महाराज १४ दैया बैसे ध्यन । प्रजापति  
गौतमी महारानी ७७ दैया बैसे ध्यन । नन्द कुमार ३७ दैया  
बैसे ध्यने धुं कल । अय्सां नन्दकुमारयात राज्यया पाखें छुं  
सत्ता लहाते ब्यूगु मखुनि, न विवाहहे यानाबिल । थ्वहे  
कारणे शाक्य खलःते छन्हु सलाह जुल । नन्द कुमारयात  
याकनं हे राज्य शासन लहाते बीगु निश्चय जुल । विवाह नं

यानाधीगु बन्दोवस्त जुल ।

उखे, सिद्धार्थ कुमार नं बुद्ध जुया राजगृह पाखे ध्यंकः  
बिज्यात घयागु समाचार शुद्धोदन महाराजया न्हाय्पने  
एयन । आः छुमानि, तुरन्त दोलंदी सैन्यत बिया राजदूत  
छत्रया भगवान् कायके छवत । तर सुनानं हे वसपोलयात  
व्वना हये मफु । वँक्व वँक्व अनसं थात । अन्तस कालुदायी  
भिक्षुं - गुम्हं न्हापा शुद्धोदन महाराजाया प्रधानम्ह मंत्री खः  
भगवानयात कपिलबस्तु नगरे व्वना हल ।

संयोग अपाय्चव चूलात्कि, उखेरं भगवान बुद्ध बेशाख  
स्वाया-पुन्ही खुनु ध्यंकः बिज्यागुया हर्षं; थुखे राजभवने  
विवाह मांगल्यया धुमधाम व नन्द कुमारयात राज्याभिषेक  
बीगु महोत्सवया तयारी । आ छुमानि, शुद्धोदन खलःते जक  
मखु अपितु, सकल कपिलबस्तुस च्वापि जनताया प्रीति व  
हर्ष स्वदुगं बढेजुलं मयात । शुद्धोदन महाराजाया नायकत्वे,  
शाक्यमुनी गौतम बुद्धयात गुलि हर्षपूर्वक स्वागत यातज्जी  
धका पाठक पाठिकापिसंहे अनुमान यानादिसं । विशेष याना  
गौतमी महारानी अपाय्चव हर्षित जुलकि जिला छूहे घाय्-  
मफु । खुदं खुदँनिसँ माछिनाच्चंगु वसपोलया तुगः बल्ल बल्ल  
छिन । उकिसं भं तथागतया ऋद्धि चमत्कार व गुबलें न्यने  
मनंगु सिचस्से च्वांगु धर्मोपदेश न्यने दुबले वसपोलपिनि  
प्रीतिया अन्तहे मन्त । अपाय्चव हर्षित जुल धाःसा, हर्षं व  
प्रीतिया थाःगाः मदया, न्हूमह बिज्याम्ह तथागत सम्यक्  
सम्बुद्धयात, अपाय्घंगु महोत्सवया उपलक्षस "भोजनया



लागी कन्है राजदरबारे बिज्याहूँ” धका हे वसपोलपिसं घाय् मफुत ।

कन्हैखुनु सुथे तथागत सम्यक् सम्बुद्ध थःगु वंश परम्परा लिनाः शहरे भिक्षापूर्व बिज्यात । थ्व समाचार न्यनाः शुद्धोदन महाराजा, घाति चो हे छखे छखे लाक्क व्वां व्वां वयाः भगवानयात प्रार्थना यानाः राजदरबारे बिज्या-कल । अन वसपोलपिसं बुद्ध सहित भिक्षुसंघयात बांलाक भोजन भपिकल । भोजनया ज्या ब्याक्क समाप्त ज्वा घुंसेलि भगवान बुद्ध, मुनाच्चर्चि सकल राज-परिवारपित्त धर्मोपदेश याना बिज्यात । उपदेश न्यना सकलें सन्तुष्ट जुल । “अहो गुजागु ज्ञान ! धन्य ! धन्य ! !” घाल । थ्व बेलस प्रजापति गौतमी महारानी स्तोतापन्न व शुद्धोदन महाराज अनागामी जुल ।

महाप्रजापति गौतमी महारानीयाके गुगु भाव भक्ति व स्नेह, भगवान बुद्धया सदुपदेश न्यनेन्हो दुमु खः, उगु भाव भक्ति व स्नेह आः मखुत । आः वसपोलया भाव भक्ति व स्नेह न्हापासिबे गुलिखेहे गम्भीर- तर मृहनिश्रित तालं मखु, न सुं छम्ह मांम्हस्यां सुं छम्ह काय्मचायात याइगु स्नेह थें खः, न सुं छम्ह मिजेंनं मिसायात याइगु थें खः, अपितु छम्ह शिष्य वा शिष्यायारूपे । गौतमी महारानीया आ दुगु श्रद्धा, भाव-भक्ति व स्नेह न्हापास्वया गुलिखे शुद्ध, निर्मल व पवित्र । आः वसपोल गौतमी महारानी बुद्धगुणयात चित्त मुंकातय्गु छगू थलयारूपे ज्या काय्गु स्वत । “जि काय्

जि कायू' घका ज्वनीगु थासे, छम्ह महारमा, गुरु, कल्याण-  
मित्र भालपा कया बिज्यात ।

कन्हे खुनु नं महारानीपिसं भगवान् बुद्धयात राज-भव-  
नेस निमंत्रण यात । जब शुद्धोदन महाराजां, नन्द कुमार-  
यात शाक्यसिंहं भिक्षु याना बिज्यात घयागु समाचार ताल,  
छक्कयात ला सारा राजदरबारे च्वंपिनि न्हाय्पं तीं तीं  
स्वाना: हसं-मसं धाल । राज दरबारे 'न्हिले ला ख्वेला'  
घयागु हलचल फेले जुल । थ्व घटनां याना नन्द कुमारया  
म्हम्ह पत्नी- जीवनकाच्छिया पासा- जनपद कल्याणीया  
मने विशेष चोट लगे जुल ।

महाप्रजापति गौतमीयात नं छकयात ला थ्व समाचारं  
भवागु द्वाले न्या फाताप्वीके थें प्वीकल । किन्तु धीरम्ह  
गौतमीं, थःगु चित्तयात खूब धैर्यं याना बिज्यात । अक्क बरू  
वसपोलं थथे संकल्प याना बिज्यात 'जि नं याकनं बुद्धशासने  
दुर्हा वना थ्व जीवन सफल याना याकनं निर्वाण प्राप्त  
याये ।' गोम्हुचा मदेंवं भगवानं राहुलभद्रयात नं म्हासुक्क  
वसतं पुंका भिक्षु याना बिज्यात । थ्व घटनां ला अं हे  
राजभवने खेला-बेला जुल । आ राजभवने कायमस्तया  
नामं सुं मन्त, केवल मिस्तै मिस्त जक ज्वी धुं कल ।

### धीवर-वस्त्र दान

राज प्रासादे च्वनाच्च्वंम्ह महाप्रजापति गौतमी महा-

रानीया मने छन्हू भगवान बुद्धयात छुनं छुं चढे याय्गु मने  
 लुया छु चढे याय्' धका मती वाय्का सोबले 'थःगुहे ल्हातं  
 चीवर वस्त्र छजो तयार याना बी' धयागु निश्चय यात ।  
 अले वसपोलं कपाय् काय्के छ्वया, राज दरबारे च्वपि  
 अनेक सखिते गुहालि कया, स्वयं कपाय् पयना काप थाना,  
 चीवर-वस्त्र छजो तयार याना बिज्यात । वस्त्र तयार याय्  
 सिधःसेलि स्वपरिवारपि नाप वसपोल नेग्रोधारामे वना  
 भगवानयात सास्तांग प्रणाम याना छसिलिना फेतुत ।  
 भगवान नाप कुशल खँ ल्हाय् सिधय्का महाप्रजापति  
 गीतमी महारानी भगवानयात थथे निवेदन यातः—

“भन्ते ! जि ध्व न्हूगु चीवर वस्त्र छजो छलपोलयात  
 चढे याय् धका थःम्हहे कपाय् पयना, थःम्हं तुं काप थाना,  
 तयार याना हयागु दु ; कृपया छलपोलं जिगु उपरे करुणा  
 तयाः ध्व न्हूगु चीवर वस्त्र छजो स्वीकार याना कया  
 बिज्याहुं ।”

गीतमीया प्रार्थना न्यनाः भगवानं थथे आज्ञा दय्का  
 बिज्यातः—

“भो गीतमी, ध्व छंगु न्हूगु चीवर वस्त्र छजो संघयात  
 चढेया, संघयात चढे याय्वं जितः नं चढे याःगु ज्वी संघयात  
 नं ।”

गीतमी महारानी धालः— “मखु भन्ते ! संघयात  
 बीत जिके भेगु रेशम, ऊन, सुति, तास, तिन्खाया वस्त्रत

यकेव दु । थ्व वस्त्र जि छलपोलयातहे धका विशेष मेहनत याना दय्का हयागु , अकि जिगु उपरे विशेष अनुकम्पा तयाः थ्व न्हूगु चीवर वस्त्र छजो छलपोलहे स्वीकार याना कयाबिज्याकि ।”

महारानीया खँ न्यनाः भगवानं पुनः न्हापाथँ हे लिसः बिया बिज्यात । महारानीं नं अथेहे धका आवेदन यात । किन्तु भगवानं न्हापा धयाथँ हे ‘सघयात हे ब्यु’ धका लिसः बिया बिज्यात ।

थुगु प्रकारं गौतमीया माले गौतमीं, भगवान्या माले भगवान थः थःगु खँ स्वकी स्वकोतक दुहरे याना धयाच्चन नं मुना च्वपि भिक्षुपि मध्ये सुं छम्हस्यांहे थथे अथे धका थ्वीके मफु, न सुं छम्हस्यां भगवान्यात बा महाप्रजापति गौतमी महारानीयात छुं धाय् फत । थुजागु बखते आनन्द स्थविरं—गुम्हकि भगवान्या कका अमृतोदन\* शाक्यया काय् खः—भगवान्यात थथे निबेदन यातः—

“भन्ते महाप्रजापति गौतमी महारानी छलपोलया काछिमां खः । वसपोलं छलपोलयात दुरूत्वंका, चिचि-पापा नका, मुले तयाः छलपोलया भरण-पोषण याना बिज्यात । वसपोल छलपोलया बडो उपकारी खः । अतएव वसपोलं चढे याःगु न्हूगु चीवर वस्त्र छजो स्वीकार याना कया बिज्यात धाःसा बेसज्जी । छलपोलया मां मदुसँलि छलपोल-

\*महावस्त्री (३-१७६) शुक्लोदन धया तल - पालि संज्ञा-  
शब्दकोष पृ. २४९

धात मचांसिं हेर-बिचार यामाः, वसपोलं छपित साब गुण  
 यानातःगु दु । हानं छलपोल नं वसपोलया उपकारी खः,  
 छायाघासा छलपोलयाहे कारणं वसपोल बुद्ध, धर्म व संघया  
 शरणे वल । छलपोलयाहे कारणं वसपोल पंचशील शुद्ध  
 ज्वीकः पालन याध् सल । छलपोलयाहे कारणं वसपोल  
 बुद्ध, धर्म तथा संघया प्रति अत्यन्त प्रसन्न जुल । हानं  
 छलपोलयाहे कारणं वसपोल आर्य सुन्दरगु शीलं युक्त जुल ।  
 छलपोलयाहे कारणं वसपोल चतुरार्यसत्य अवबोध याना  
 बिज्यात । अकि भन्ते छलपोलं वसपोलया चीवर वस्त्र  
 स्वीकार याना कया बिज्यात धाःसा वसपोलयात तद्धं गु  
 उपकार ज्वी, अनन्त पुण्य लाई ।”

आनन्दया प्रार्थना न्यनाः भगवानं वसपोलयात निम्न-  
 रूपं लिखः बिधा बिज्यात :—

“आनन्द ! छं धाःगु खंसत्य खः । किन्तु आनन्द  
 गुम्ह, ब्यक्तिया कारणं सुं गुम्ह ब्यक्ति बुद्धादिया शरणे  
 वया; शीलादि पालन यानाः धर्मज्ञान दय्को, उम्ह ब्यक्ति  
 उजाम्ह ब्यक्तियात केवल नमस्कार, पूजा, आदर-मान  
 उपस्थान, चीवर, भोजन, वासस्थान व औषध इत्यादि दान  
 बीमात्रं यथोचित प्रत्युपकार याःगु ज्वी मखु ।”

### क्लिप्यता ब्यक्तिगत दान

“आनन्द ! निम्न क्लिप्यता प्रकारया ब्यक्तिगत दान दु ।

यथा :—

- ( १ ) तथागत अर्हत् सम्यक् सम्बुद्धयात् बीगु दान ।
- ( २ ) प्रत्येक सम्बुद्धयात् बीगु दान ।
- ( ३ ) तथागतया अर्हत् शिष्यपित बीगु दान ।
- ( ४ ) अर्हत्-फल साक्षात्कार याय्त प्रयत्न याना च्वपित बीगु दान ।
- ( ५ ) अनागामीपित बीगु दान ।
- ( ६ ) अनागामी-फल साक्षात्कार याय्त प्रयत्न याना च्वपित बीगु दान ।
- ( ७ ) सकृदागामीपित बीगु दान ।
- ( ८ ) सकृदागामी-फल साक्षात्कार याय्त प्रयत्न याना च्वपित बीगु दान ।
- ( ९ ) स्रोतापन्नपित बीगु दान ।
- ( १० ) स्रोतापन्न-फल साक्षात्कार याय्त प्रयत्न याना च्वपित बीगु दान ।
- ( ११ ) पञ्चकामं विरक्तपित अर्थात् न्यागू अभिज्ञा लामीपित बीगु दान ।
- ( १२ ) पृथग्जन-शीलं युक्तपित अर्थात् हिंसा, छल कपत् यानाः जीविका मयाइपित बीगु दान ।
- ( १३ ) दुःशील पृथग्जनपित अर्थात् छल-कपट हिंसा यानाः जीविका याइपित बीगु दान ।
- ( १४ ) तिर्यग्योनी च्वपित अर्थात् पशु-पक्षीतेत बीगु दान ।

ध्व भिष्यता दानयात् व्यक्तिगत दान धाई ।

“आनन्द ! थुकेमध्ये तिर्यग्योनी च्वंपि पशु-पक्षीतेत  
 बीगु दानया फल सच्छिदुगं दइ । दुःशील पृथग्जनपित बीगु  
 दानया फल दोच्छिदुगं दइ । शीलवान् पृथग्जनपित बीगु  
 दान सच्छिदोलदुगं दइ । पञ्चकामं विरक्तपित बीगुदानया फल  
 सच्छि करण्डदुगं दइ । स्रोतापन्न-फल साक्षात्कार याय्त  
 प्रयत्न यानाजुपित बीगु दानया फल असख्य ' = अनगिन्ति)  
 अप्रमेय्य (प्रमाणरहित) दई । स्रोतापन्नपित बीगु दानया  
 फलया बारेला खं हे ल्हाय्माःगु मदु! अक्क सक्रदागामी... ..  
 इत्यादिपित बीगु दानया फलया बारेला धाय्गुहे छु ?

### न्हैता संघदान

- “आनन्द ! थ्व न्हैता संघगत दान दु । यथाः--
- (१) बुद्ध प्रमुख भिक्षुसंघ व भिक्षुणीसंघयात बीगु दान ।
  - (२) तथागत परिनिर्वाणं लिपा भिक्षुसंघ व भिक्षुणी संघयात बीगु दान ।
  - (३) भिक्षुसंघयात जक बीगु दान ।
  - (४) भिक्षुणीसंघयात जक बीगु दान ।
  - (५) दान बीत संघयापाखें जितः थोम्ह भिक्षुपि व भिक्षुणीपि बिया बिज्याहुँ धका बीगु दान ।
  - (६) दान बीत संघयापाखें जितः थोम्ह भिक्षुपि बिया बिज्याहुँ धका बीगु दान ।
  - (७) दान बीत संघपाखें जितः थोम्ह भिक्षुणीपि बिया बिज्याहुँ धका बीगु दान ।

आनन्द ! ध्व न्हेता दानयात संवदान धाई ।

“आनन्द! भविष्य काले भिक्षु धयापि केवल नामधा-  
रीपि (= गोत्रभू) ज्वी, केवल गःपते काषाय बस्त्र हिनीपि  
(= काषायकण्ठ।) ज्वी दुःशील, पापिपि, ज्वी । मनूतेस संघया  
नामं उजापि पापधर्मी दुःशीलपित दान बी । उजागु समये  
बीगु संघगत दानया फलहे नं जि असंख्येय्य, अप्रमेय्य घाय् ।  
अतएव आनन्द! छुकथं हे व्यक्तिगत दान, संघगतदान स्वया  
श्रेष्ठ मजू ।

### दान विशुद्धि

“आनन्द ! निम्न प्यता किसिमं दानया विशुद्धि  
ज्वी । यथा:- ( १ ) आनन्द ! गुलि दान दाताया पाखें  
विशुद्धि ज्वी प्रतिग्राहकया पाखें (काइमहसिया पाखें) मखु,  
( २ ) गुलि दान प्रतिग्राहकया पाखें विशुद्धि ज्वी दाताया  
पाखें मखु, ( ३ ) हानं गुलि दान न दाताया पाखें विशुद्धि  
ज्वी, न प्रतिग्राहकया पाखें, ( ४ ) हानं गुलि दान दाताया पाखें  
नं विशुद्धि ज्वी, प्रतिग्राहकया पाखें नं ।

गथे धाःसा आनन्द !- ( १ ) गुगु दान बीगु बखते  
दायक शीलवान कल्याण धर्मी व प्रतिग्राहक दुःशील पाप-  
धर्मी ज्वी, उगु बखते व दान दायकया पाखें विशुद्धि ज्वी ।  
( २ ) गुगु दान बीगु बखते दायक दुःशील पापधर्मी जुया  
प्रतिग्राहक शीलवान कल्याण धर्मी ज्वी, उगु बखते व दान  
प्रतिग्राहकया पाखें विशुद्धि ज्वी । ( ३ ) गुगु दान बीगु बखते  
निगुलि पक्षयापि ब्यक्तित दुःशील पापधर्मी ज्वी, उगु बखते



व दान न दायकया पाखे विशुद्धि ज्वी, न प्रतिग्राहकया पाखे । (४) हानं गुगु दान बीगु बखते दायक पक्ष नं प्रति-  
ग्राहक पक्ष नं शीलवान् कल्याण धर्मी ज्वी, उगु बखते व दान निखलःसिया पाखे विशुद्धि ज्वी । आनन्द ! थ्व प्यता दानया विशुद्धि खः\* ।”

आनन्द स्थविरयात तथागत सम्यक् सम्बुद्धं उपयुक्त दानया खं विश्लेषण याना उजुं दय्का बिज्यागु खनाः प्रजापति गौतमी महारानी साब खुशि जुया भगवान बुद्ध-  
यात दानबी घका हयात गु न्हूगु चीवर वस्त्र छजो बुद्ध प्रमुख भिक्षुसंघयात चढे याना बिज्यात ।

### शुद्धोदन महाराजाया देहत्याग

कथःथे भगवान् राजगृहे बिज्यात । अन वेलुवनारामे द्वितीय वर्षावास याना बिज्यात । तृतीय व चतुर्थ वर्षावास नं राजगृह वेलुवनारामेसं याना बिज्यात ।

भगवान् बुद्ध, बुद्ध जुया न्यादें दत । शुद्धोदन महा-  
राज ९७ दैया बेसे थ्यन । बृद्धतां वसपोलयात त्यला हल ।  
ध्याधि वसपोलयात स्वत्ताक ज्वना हल । छन्हु, शुद्धोदन  
महाराजा तस्सकं उसांय् मन्त । उखे वेलुवने बिज्याना च्वंम्ह  
शाक्यसिहया सुथ न्हाप्पनं दना, सदांयार्थे महाकरूणा  
समापत्ति ध्याने च्वना लीकयापाखे ध्यान-दृष्टि स्वया

\*दक्खिणाबिभङ्ग सुत्त—म० ऊ०

बिज्याबले, थः अबुजु शुद्धोदन महाराजा रोगं पीडित जुयाः  
थःत दर्शन याय्गु इच्छा यानाच्चंगु खंका, आनन्द नन्दादि  
श्रावक भिक्षुपि व्वना, तथागत कपिलवस्तु नगरे बिज्यात ।  
अन वसपोल नेग्रोधारामे च्वना बिज्यात ।

यथासमये भगवान् राजभवने बिज्यात । उसाय् मद्दुम्ह  
अबु शुद्धोदन महाराजाया छ्यने लाहा तयाः वसपोलं मैत्री  
याना बिज्यात । नन्द स्थविरं जुजुया जवगु लाहा ज्वनाः  
मैत्री याना बिज्यात । आनन्द स्थविरं खवगु लाहा ज्वनाः  
मैत्री याना बिज्यात । सारिपुत्र महामौद्गल्यायन स्थविर-  
पिसं नं महाराजाया म्हे लाहा तयाः मैत्री याना बिज्यात ।  
बुद्ध प्रमुख श्रावकसंघपि वयाः वसपोलयात उगु छाँटं मैत्री  
याःगु खनाः, शुद्धोदन महाराजाया मन साब याउँसे च्वन ।  
वसपोलया शारीरिक वेदना ब्याक्क अनवँ थनवँ मदेक  
शान्त जुल । वसपोल थपाय्च्व खुशि जुलकि वसपोलया  
प्वाकः प्वाकः गनाच्चंगु मिखां हर्ष ख्वभिधाः बाः बाः वल ।  
थ्व बेलस महाकारुणिक शाक्यसिंहं वसपोलयात अनित्य  
युक्तगु धर्मोपदेश याना बिज्यात । अनित्य, दुःख व अनात्मया  
उपदेश न्यताः शुद्धोदन महाराजा, श्वेतच्छत्रया क्वसं च्वना,  
तृष्णाक्षय जुयाः अनसं अर्हत् जुयाः बिज्यात । अरहत् जुया  
न्हेनु दुखुनु वसपोल सदाया निति अनुपादिशेष परिनिर्वाण  
जुया बिज्यात । थ्व बेलस वसपोसया आयु ६७ दँ दुगु  
जुल ॐ ।

ॐ भगवान् गौतम बुद्ध पृ० ८३ ।

शाक्य राजखलःते नायो शुद्धोदन महाराजा मदुगु समाचार कपिलवस्तु नगर छगूलि वायु फेले जूथे फेले जुल । अनेक शाक्य ज्ञातिबन्धुपि एकत्रित जुल । बुद्ध सहित सकल शाक्यखलःत मुनाः शुद्धोदन महाराजाया अन्तिम सत्कार यात ।

श्व घटनां याना महाप्रजापति गौतमी महारानीया चित्ते तस्सकं विरक्त जुल । वसपोलयात गृहवास छप्ति हे मयल । याकनं हे प्रब्रज्या ज्वी माल धका मती ल्वीका बिज्यात । तर भगवान्या अनुमति मदय्कं मजोगु जूयान्ति भगवान् नापलानाः प्रब्रज्याया लागी प्रार्थना याय्गु मने तथा च्वन । किन्तु भगवान याकनं हे राजगृहेसं लिहाँ बिज्यात ।

### गृहत्यागया संकल्प

छगू समये भगवान बुद्ध कपिलवस्तु नगरे नेग्रोधारामे बिज्यात । उगु बखते अन शाक्य राजकुमारपि व कोलिय राजकुमारपिनि दश्वी रोहिणी नदी- निखलः सियां मंकाःगु खुसि-या बारे ल्वापु जुयाः निखलं राजकुमारपि स-शस्त्र नदीया सीथे सलंसः मुना च्वन । श्व खँ सियाः तथागत सम्यक् सम्बुद्ध उगु घटनास्थले बिज्याना छथाय् सिमाक्वे च्वना बिज्यात ।

राजकुमारपिसं भगवानयात खनाः निखलं राजकुमारपि वसपोलया न्ह्योने वन । वसपोल राजकुमारपिके स-शस्त्र

खुसि सीथे मुना च्वंगुया कारण न्यना बिज्यासेलि इमिस रोहिणी नदीया कारणे युद्धज्वीत सनाच्वंगु धका घाल । भगवानं इमित क्रोधयाना ल्वायूगु ठीक मजू धका समयानु-कूल उपदेश याना बिज्यासे कलहविवाद सूत्र ☀ आत्मदण्ड सूत्र ☞ व्याख्यान याना बिज्यात । थुलि उपदेश न्यने घुंसेलि ईपि सकलें मिले जुल । राजकुमारपिनि क्रोध व्याकक शान्त जुल । भगवान् बुद्धं क्रोध व वैरोभावया अनेक दोषखँ कना राजकुमारपित फन्दन जातक, दहभ जातक, लटुकिक जातक तथा वट्टक जातकया खँ उजुं दय्का बिज्यात । थुगु प्रकारं वसपोलं शाक्य व कोलिय राजकुमारपिनि ल्वापुयात शान्त याना: इमित परस्पर मिले याना बिज्यात । थ्वहे कारणे तुं वसपोलं राजकुमारपित शाक्य व कोलिय खल:त छम्हहे मां-बौयापाखँ दुपि दाजुकिजा ततावयहेपिनि सन्तानत ख: धका शाक्य कोलियते न्हापांनिसेंयागु इतिइस वंशावली खँ आज्ञा दय्का बिज्यात । थ्व खँ न्यना: राजखल:त निखल अतिकं सन्तुष्ट जुल । थुकियाहे फलस्वरूप कोलिय राजखल:तेसं २५० म्ह राजकुमारपित व शाक्य राजखल:तेसं २५० म्ह राजकुमारपित प्रब्रजित याकल ।

लिपा भिक्षुजूपि राजकुमारपिनि चित्त, थ:थ: मिसाते कारणे भति चंचल जूगु सीका:, भगवान् बुद्धं इमित कपिल-वस्तु नगरं उत्तरपाखे च्वंगु महावने व्वना यंका: अन अनेक

☀ सुत्तनिपात ।

☞ सुत्तनिपात ।

पहार पर्वत वयनाः कुणाल जातक कनाः विषय-वासनाय्  
मन मवनीपि याना बिज्यात । जातकया खँ न्यनाः इमि मन  
निश्चल जुल । अले भगवानं गुगु बुद्धपिनि धर्मं खँ खः उगु  
प्यंगू आर्यसत्यया खँ कनाः सकसितं आर्यपुरुष याना  
बिज्यात । उकीमध्ये दकेसिबे व्वेच्वंम्ह स्रोतापन्न, दकेसिबे  
च्वे च्वंम्ह अनागामी । न अरहत् न पृथग्जन । थुलि यानाः  
बिज्याय् घुंसेलि वसपोलं हानं भिक्षुपित विदर्शना ध्यानया  
उपदेश यानाः सकसितं अहंत् याना बिज्यात । अले न्यासः  
भिक्षुपिं व्वना वसपोल पुनः नेग्रोधारामे बिज्यात ।

शाक्य व कोलिय भिक्षुपित थःथः मिसातेसं पुनः अनेक  
खँ न्यकल । वसपोलपिसं, “आः जिपि गृहस्थो ज्वी घका  
छिमिसं घना म्हगसे नं खने मोल । छिमि थः माःमाःगु  
कर्तव्य पालन या” घका घाल । थ्व खँ न्यना शाक्यकुमारीपि  
सकस्यां निराश जुल ।

भिजां-मिजांदंकः राजभवने च्वनाच्वंम्ह महारानी  
प्रजापति गौतमीया मने छन्हु-- “आः गय्याना प्रब्रजित  
ज्वी ?” घका बिचाः यानाः “भगवान्याथाय् वना प्रब्रज्या  
पवं वने माल” घका मती तयाः बिज्यात । उखे कोलिय व  
शाक्यकुमारपि भिक्षु जूगुलि यानाः इमि प्रत्येक मिसात नं,  
“राजकुमारपि जति भिक्षु जूसैलि भीपि जक छाय् छे च्वं  
च्वनेगु ?” घयार्थे मती लुयाः, “महाप्रजापति गौतमी महा-  
रानीयाथाय् वनाः वसपोलया गुहालि कया प्रब्रजित ज्वी-  
माल” घका न्यासल शाक्य कुमारीपि प्रजापति गौतमी  
महारानीयाथाय् वन । अन इमिसं महारानीयात ब्याक्क खँ

निवेदन यात । महारानीयात ला अगःचा मालां द्यगःचा लूथें जुल । याकःचा जुया चिन्तित जुयाच्चंम्ह महारानीयात ला थ्व साबहे तःभंगु वासः थें जुल । आः छुमानि, न्यासल शाक्य कुमारीपि नापं वसपोल नेग्रोधारामे वन । वनाः भगवान्यात सादर वन्दना याना छसिलिक्क फेतुत । कुशल खं ल्हाय धुंसेलि महाप्रजापति गौतमी महारानीं भगवान्याके यथे प्रार्थना यातः—

“भन्ते ! जिपि मिसातेत नं तथागतया धर्म-विनये प्रव्रजित ज्वीगु वचन बिद्या बिज्यात धाःसा जिपि मिसा-जातिपिनि महान कल्याण ज्वी ।”

गौतमी महारानीया खं न्यनाः भगवानं यथे आज्ञा जुयाः बिज्यातः—

गौतमी, स्त्रीजातिपित तथागतया धर्म-विनये प्रव्रज्या याय्गु इच्छा छता छं याय्मते ।”

भगवान्या लिसः न्यनाः महारानीं स्वको स्वको तक जिलाहा जुयाः स्त्री जातिपित प्रव्रज्या याय्गु वचन पवन । परन्तु भगवानं स्वकोतक नं ‘इच्छा याय्मते’ धकाहे घया बिज्यासेलि गौतमी महारानी अतिकं दुःखी जुयाः, “आः छुयाय् ! भगवानं मिसातेत प्रव्रज्या याय्गु वचन बिद्या बिमज्या !” धका मन व्वंतुंका, अतिकं अफसोस यानाः मिलाय् खोभि जाय्क तथा, नुगः मछिका, भगवान्यात

सास्तांग दण्डवत् यानाः प्रदक्षिणा यानाः स्यहाँ बिज्यात ।

भगवान् नं इच्छानुसार कपिलवस्तु नगरे चवना  
बिज्यानाः लिपा कथःथें वैशाली बिज्याना कूटागार विहारे  
चवना बिज्यात ।

### गृहत्याग

कपिलवस्तुया राजभवने थौं-कन्हें न्हापार्थें चह-चक  
मडु । यद्यपि अनया सजि -सजाव न्हापा गथे अथेहे तिन,  
अयसां ज्वाल्लं थोगु मतः आका भाकां फवाकक सीगुर्थें भवन  
छगुलि बुलुस्से च्वं । थुजागु थासे यशोधरा देवी छम्ह हाःना  
मडुम्ह, ल दापा जुयाः मसाने लानाच्वंम्ह, सुं छम्ह अवलार्थें  
च्वंक असहाय जुयाः नुगः मर्छिका च्वन । लार्छि मलार्छि  
वसपोलयात थः प्रिय पुत्र राहुल भद्रया खाः लुमसि वइगु,  
थः स्वामी तथागतया स्मरण नं भल भल ज्वीगु । छक छक  
थुजागु स्मरणज्वीबले वसपोल थःत थम्हं चायेके मफु । थुमु  
प्रकारं जक मती ल्वीका वसपोल ठकित जुल । अन्तस  
वसपोसं थथे निश्चय यात, “भगवान्याथाय् वना अवस्यनं  
प्रव्रजित ज्वी ।”

उखें प्रजापति गीतमी नं छ्यौं क्वछुका, नुंग  
कोत्वीका विहारं लिहाँ वल । माःजु व भौ निह्यसिया मने  
उत्ति उत्ति वंराग्यं जाया च्वन । वसपोलपित पलखहे छ्यें  
च्वने मन्दुगु मखे धुंकल । तर छुयाय् नारी जीवन ! याकचा

गमं वने गथे ? प्रतिबन्ध भतिर्चा मया । ..... अन यशोधरा देवीं माःजुम्हसित थः भगवान्याथाय् वनाः प्रवृजित जूवनेगु खँ कन । गौतमी महारानीं घाल -“भो प्रिय भमचा मय्जु, छन्त जि प्रवृज्या उवीमते धकाला कदाचित्त धाय् मखु । छ जकला छु जि नं प्रवृजित मज्जेसे तोते मखु । किन्तु भमचा मय्जु, छ याक.चा वनाः गय्याना भगवान्याके प्रवृज्या पवनेत्यना ? न्हापाहे ला छ वसपोलनाप छसः खँ ल्हाय् मछ्याम्ह, आः, छं गय्याना वसपोल नापं जवाल सवाल यानाः खँ ल्हायत्यना ? अकिसं न्हापाथे एकान्ते लाका खँ ल्हाय् धयागुला छना म्हगसे हे खने मो । अतएव आःयात छ छे-सं च्वना च्व । जितः हे ला वसपोलं प्रवृज्या उवीगु वचन बिया बिमज्यानि, छन्त गय्बी ? जि वनाः न्हागु यानानं प्रवृज्या उवीगु वचन काये, अले छ वयाः प्रवृजित जू ।” यशोधरा देवीं माँजुम्हसिया खँ उचित भालपाः स्वीकार याना काल ।

भमचा मय्जु यशोधरा देवीयात थथे धयाः थम्हं मतील्वीकल, “आः गय्याना प्रवृजित उवी ?” अनेक कल्पना याय् धुंसेलि अन्तस वसपोलं थः थःम्ह तुं काषाय-वस्त्र धारण यानाः भगवान्याथाय् वनेगु निश्चय यात । उखे पासा वयाच्चंपि शाक्य कुमारीपिसं नं थुगु उपाययात ठिक भापिल । गौतमी महारानीया मने-“जि स्वयं सँ खानाः काषायवस्त्र धारण याना वंसेलि जि थुजाम्ह बुद्धियात भगवानं गबले बचन बिया बिमज्याई । माँ धका बचन बिया बिमस्यासां म्हासुगु वसतं पुने धुंम्हसित हानं गथे छें लितछ्वे



घयागु विचारं ला अवश्य वचन बिया बिज्याई ।”

शुलि मने निश्चय यानाः नौ सःतके छ्वया राज-  
भवनेसं शीर मुण्डन यानाः, वस्त्र फेरे याना छम्ह साधुनोया  
भेष कयाः, वैशाली बिज्यायूत तयार जुल । न्यासल शाक्य  
कुमारीपिसं नं म्हति म्हतिं सँ खानाः काषायवस्त्र धारण  
यात । राजकर्मचारीपि व शाक्य थः थितिपि आपालं वयाः  
वसपोलयात गंवल । किन्तु वसपोलं सुयागुं खँ मन्यंसे  
वैशाली वनेगु हे निश्चय यात । अले गुलिस्यां रथ तयार  
यात, गुलिस्यां उलिकाथ तयार यात । परन्तु गौतमी  
महारानीं छम्हसियाहे खँ मन्यंसे न्यासिवनेगु निर्णय यात ।  
कारण, प्रब्रज्या ज्वीत रथ बाहनादिस च्वना वनेबले  
भगवानं, “उलिहे दुःखसी मफुपिसं छु श्रमण जीवन हना  
नई” घका घाई घयागु भयं । अयसां वसपोल कपिलवस्तु  
नगपं पिहां बिज्याः बले वसपोल नापं राजकर्मचारीपि  
माच्छि साथे वन । ले थासे थासे बासं च्वनेगुया प्रबन्ध  
यात । नयगु त्वनेगु नं ब्याक्क क्वबीका यंकल । देश छगुलि  
हनुनुनु थ्वेक महाप्रजापति गौतमी महारानीं मिक्षुणी ज्वीत  
कपिलवस्तु तोता बिज्यात ।

### प्रब्रज्या लाभ

बुलुहुं वसपोल वैशाली थ्यन । छिसिनिसें कूटागार  
बिहारे थ्यंकः बिज्यात । म्ह छम्हं भवीसे च्वंकः धुलं जाया  
च्वन । तुती पवं पवं गानाच्वन । थासे थासे पालितःले

छ्यंगु च्वचटुला च्वन । जूनं गुबले मज्जी ! गुबलें पलाछि मनंम्ह, राज ऐश्वर्ये च्वना च्वंम्ह, उकिसं ८० दँ मछि दुम्ह बुढि ! छकोतलं उलिमछि लँ न्यासि वंगु ! तर मनया बेगे थ्व ब्याक्क कष्टं वसपोलया निति छुथे नं मच्चं । बिहारे थ्यसेलि छक्वतलं विहारे दुने दुहाँ वनेगु साहस याय् मफुत । भगवानं छुं घाइला घयागु भय मने जुया च्वन । हानं छुं गथे जुयाः भगवानं वचन हे मबिल घाःसा, काषायवस्त्रं पुने धुंका छु याय् का ? घयार्थे मने सन्देह जुया च्वन । वसपोलं बचनहे बिया बिमज्यात घाःसा वसपोलया बिरोधे थथे यानाज्वीगु नं कदाचित उचित मजू घयागु अनेक प्रकारं मने कल्पना जुया पिलाक्व थर थर खाकाच्वन । अकि वसपोल शून्य निःशब्दगु बिहारे थ्यंकः बिज्याना नं दुने दुहाँ वने मफयाः, दुःखी दुमनं जुयाः सुकु सुकुं ख्वया, मिखाय् जाय्क ख्वभि तथा लुखा खल्वीसं इवाताहाँ दना च्वन । तलं कुहाँ बिज्याःम्ह आनन्द स्थविरं, तुति ताति मंकः, म्ह छम्हं भ्वीसे च्वंकः, सुकु सुकुं ख्वयाच्वंम्ह गौतमी महारानी खनाः, “छाय् छपि भो गौतमी, थथे दुःखसिया थुगु रूपं थन च्वनाः ख्वया च्वनागु ?” घका न्यन ।

प्रजाप्रते गौतमी महारानी थथे घयाः लिसः बिलः-

“छु याय्ले भन्ते, भगवानं मिसातेत तथागतया शासने प्रब्रजित ज्वीगु अनुमति बिया बिमज्याः, गुलि बिन्ति याना नं छुं लगे मजुसेलि !”

“अयजूसा भो गौतमी महारानी, जि भगवान्याके

मिसातेत तथागतया शासने प्रब्रजित ज्वीगु अनुमति कया महःतले छलपोल थनसं च्वना बिज्याहुं” घयाः आनन्द स्थविर भगवान्याथाय् बिज्यात । अले भगवानयात दण्डवत् यानाः छसिलिक्क फेतुना भगवानयात थथे निवेदन यात :—

“भन्ते भगवान्, महाप्रजापति गीतमी महारानी भगवानं मिसातेत तथागतया धर्म-बिनये प्रब्रजित ज्वीगु अनुमति बिया बिमज्या घका दुःखी दुर्मन जुयाः, थः थःम्हंतुं सँ खाना काषायवस्त्र पुना तुतित्ताति मंक, म्ह-म्हि भ्वैसे च्वंक, साबहे कष्ट सिया कपिलवस्तु नगरनिसे हे न्यासि वयाः; विहारया लुखा खल्वी च्वना सुकुसुकुं ख्वया च्वन । भन्ते भगवान्, मिसातयेत नं तथागतया शासने प्रब्रज्या याना बिज्यात धासा इमित साब उपकार ज्वी । बिया बिज्याकि भन्ते मिसातयेत प्रब्रज्या ज्वीगु अनुमति ।”

“आनन्द ! छं थुके इच्छा याय्मते” घका भगवानं लिसः बिया बिज्यात ।

अय्सां आनन्द स्थविरं मिसातेत प्रब्रज्या बीकेया लागी स्वक्व स्वक्वतक भगवान्याके अनुमति पवन । किन्तु भगवानं स्वक्वतकनं अथेहे घया लिसः बिया बिज्यात ।

अथे जूसैलि आनन्द स्थविर नाजवाब जुल । वसपोल पलख सुमुक च्वना बिज्यात । तर वसपोलया मन मच्चं । उकि वसपोलं थथे मती तल — “भगवानं मिसातेत प्रब्रज्या

ज्वीगु अनुमति बिया बिज्या, आः गथे यायुगु ? खै मखु  
बा ! मेगु हे खँ क्यना मेकथं हे अनुमति पवने मालि !”

थुली मने निश्चय यानाः आनन्द स्थविरं भगवान्याके  
थथे प्रश्न यातः—

“मखु भन्ते ! मिसातेसं छेँ-बुँ तोताः भ्रमण जीवन  
कयाः; तथागतया धर्म-विनये च्वनाः स्रोतापन्नादि अहंत  
फल साक्षात्कार याय् मफुला ?”

“फु आनन्द !”

“अय् जूसा भन्ते ! प्रजापति गौतमी महारानी छल-  
पोलया साब उपकारी खः, छलपोलया च्चिधमाँ खः, छल-  
पोलया मांया सद्दे वधहेँ नं खः । छलपोलया माँ स्वर्गवास  
जुसेंसि छलपोलयात वसपोलं दुरू त्वंका च्चिचि-पापा नका,  
छपिनि खी-चो कयाः, छलपोलयात अनेक बिचाः यानाः  
छलपोलयात बोलंका बिज्यात । अतएव भन्ते ! मिसातेत  
प्रव्रजित ज्वीगु अनुमति बिया बिज्यात धाःसा प्रजापति  
गौतमी सहित आपालं स्त्रीजातिया कल्याण ज्वी ।”

भगवानं धया बिज्यातः—

“आनन्द ! अय्सा यदि प्रजापति गौतमी महारानी  
निम्न च्यागू विशेष नियम पालन यायुगु कराल याःसा, वहे  
गौतमीया प्रव्रज्या व उपसम्पदा ज्वी ।”

च्यागू विशेष नियम थथेः—

“(१) उपसम्पदां सच्छिदं दुम्ह भिक्षुणीं नं उखुतिनि  
उपसम्पदा जूम्ह भिक्षुयात अभिवादन, प्रत्युपस्थान, नमस्कार  
तथा आदर-सत्कार याय्माः । ध्व नियम सत्कारपूर्वक,  
गौरवपूर्वक मान तथाः भक्ति तथाः जीवनकाच्छि उल्लंघन  
याय् मज्जू ।

(२) भिक्षुणीपिसं भिक्षु आश्रम मदुगु आवासे वर्षावास  
याय्मज्जू । ध्व नियम नं जीवनकाच्छि उल्लंघन याय् मज्जू ।

(३) प्रत्येक निगू हप्ताय् भिक्षुणीपि भिक्षुपिथाय्  
वनाः, ध्व गुगु उपोसथ खः घका व भिक्षुणीपित उपदेश  
याईम्ह भिक्षु दुला मदु ? घका न्यने फय्केमाः । ध्व नियम  
नं० जीवनकाच्छि उल्लंघन याय्मज्जू ।

(४) वर्षावास च्वने धुं पि भिक्षुणीपिस भिक्षु व भिक्षुणी  
संघयाथाय् वनाः दृष्ट, श्रुत व परिशंकितया हिंसावं पवारणा  
याय्माः । ध्व नियम नं० जीवनकाच्छि उल्लंघन याय्  
मज्जू ।

(५) गुरु धर्मे (संघादिशेषादि दोषे) लाःपि भिक्षुणी-  
पिसं निगुलि संघसभाय् वनाः छगू हप्ता तक मानात्मता  
पालन याय्माः । ध्व नियम नं० जीवनकाच्छि उल्लंघन  
याय् मज्जू ।

(६) निदं तक खुगू शिक्षा\* बांलाक पालन याय्

\* पंचशील व विकाल भोजन शिक्षा ।

धुंम्ह शिक्षमाणविकां भिक्षु व भिक्षुणीं निगुलि संघसभाय्  
वनाः उपसम्पदा पवनेमाः । श्व नियम नं० जीवनकाच्छि  
उल्लंघन याय् मज्जू ।

(७) भिक्षुणीपिसं छुं कथं हे भिक्षुपित निन्दा व उपहास  
याय् मज्जू । श्व नियम नं० जीवनकाच्छि उल्लंघन याय्  
मज्जू ।

(८) थनिंसिं भिक्षुपिनि प्रति भिक्षुणीपिनि म्हुतुप्वाः  
तित, भिक्षुणीपिनि प्रति भिक्षुपिनि म्हुतुप्वाः चाल । श्व  
नियम नं० जीवनकाच्छि उल्लंघन याय् मज्जू ।

“आनन्द ! यदि प्रजापति गौतमी महारानीं उपर्युक्त  
च्यागू विशेष नियमयात स्वीकार याना काल घाःसा, वहे  
गौतमीया उपसम्पदा व प्रब्रज्या जुई ।”

अले आनन्द स्थविरं व च्यागू नियम न्वेवेका, प्रजापति  
गौतमी महारानीयात कनाः, यदि श्व च्यागू विशेष नियम  
छलपोलं स्वीकार यात घाःसा भगवानं वहे छलपोलया  
प्रब्रज्या व उपसम्पदा जुई घका आज्ञा जुया बिज्यागु दु घका  
नं कन । थथे खँ कना वसपोलं प्रजापति गौतमी महारानी-  
यात थथे घाल :—

“यदि गौतमी, छलपोलं श्व च्यागू नियमयात जीवन-  
काच्छि पालन याय् घका स्वीकार याना बिज्यात घाःसा  
श्वहे छलपोलया प्रब्रज्या व उपसम्पदा जुल ।”

आनन्द स्थविरया खं न्यना गौतमी महारानीया मन थपाय्चव याउंसे चवन कि कपाय् छु याउंसे चवनी ! वसपोलया मने च्वंगु सन्देह व भय ब्याक्क दूर जुल । वसपोल साव प्रसन्न जुल । अकि वसपोल आनन्द स्थविरयात थथे निवेदन यात : -

“भो भन्ते आनन्द, गथे सुं छम्ह बांलाकेमाःम्ह धांचा यायमाःम्ह, समयाय्माःम्ह मनूयात, बांबांलागु स्वांमा, अतर पाउदर, वसः तिसा इत्यादि प्राप्त ज्वीबले व उकीयात गुलि प्रसन्नतापूर्वक निपालाहातं छ्यने फयाकाई, अथेहे भन्ते ! जि थ्व च्यागू विशेष नियमयात जीवनकाच्छि उल्लंघन याय् मज्यूगु घका सीकाः सादर छ्यने फया काये ।”

प्रजापति महारानीया लिसः न्यना आनन्द स्थविर भगवानयाथाय् वना वसपोलयात प्रजापति गौतमी महारानी व च्यागू विशेष नियमयात जीवनकाच्छि पालन याय् घका कराल यात घका भगवानयात निवेदन यात ।

आनन्द स्थविरया खं न्यना भगवानं थथे उजुं दय्का बिज्यात :—

“आनन्द ! यदि मिसातेत तथागतया धर्म-विनये प्रब्रज्या ज्वीगु अवकाश प्राप्त मज्यूगु जूसा थ्व ब्रह्मचर्य शासन दोलछि दें तक स्थिर ज्वीगु, किन्तु आः मिसातेत प्रब्रज्या प्राप्त जूगु निति थ्व ब्रह्मचर्य शासन न्यासः दें तक जक स्थिर ज्वी । गथे आनन्द ! यक्क मिसात व भतिचा

मिजँत च्वना च्वगु छें खुँतेसं अपुक्क हे स्यंकी, अथेहे आनन्द ! गुगु धर्म-विनये मिसातेत प्रब्रजित ज्वीगु अबकाश प्राप्त ज्वी उगु धर्म-विनये ब्रह्मचर्य शासन चिरस्थायी ज्वी-मखु ..... । गथे आनन्द ! सु मनूनं तःधगु पुखुली च्वंगु लः पिने वने न्ह्यो हे पुखुछ्चाख्यरं पःखा दनाः लः लिकुंकी, अथे हे जि आनन्द ! न्ह्यव.हे भिक्षुणोपित जीवनकाच्छि उल्लघ्नन याय् मज्युगु च्यागू विशेष नियम दय्का बिया । ☀

### शिक्षा-प्रेम

थुकथं भिक्षुणी ज्वीधुंमेलो महाप्रजापति गीतमी भिक्षुणीया मने, “अहो ! बल्ल बल्ल दुर्लभगु प्रब्रज्या सम्पत्ति प्राप्त जुल” धका सन्तोष जुल । सन्तोष जुया वसपोलं उत्तरोत्तर पालन याना यंकेमाःगु शोलया बारे बिचार यासे थथे मने ल्वीक । :—

“गथे रत्न जरित तिसां तियाच्चंम्ह न्हूम्ह भमचा, थःगु छ्यने च्वंगु तिसा लुसां कुतुं वनी घयागु भय कया बडो सयम याना ज्वी, अथेहे जि नं थ्व च्यागू नियमयात बांलाक संयम यानाः पालन याय्मा । थ्व न्यासल शाक्य-कुमारोपिनि बारे नं जि छु छु नियम पालन याय्माः खनि ? अथवा थुं पि नापं गुकथं व्यवहार याय्माः खनी ?”

थुलि कल्पना यानाः महाप्रजापति गीतमी भिक्षुणी

☀भिक्षुनीवखन्ध—चुल्लवग्ग ।



भगवानयाथाय वन । वना सादर दण्डवत् यानाः छसिलिक्क फेतुनाः थथे निवेदन यात :—

“भन्ते ! भगवान्, आः थ्व शाक्य कुमारीपिनि बारे जि गुकथं व्यवहार याये ?”

भगवानं थ्वहे कारणे गौतमी भिक्षुणीयात् अनेक धर्मोपदेश बियाः प्रसन्न यानाः सन्तुष्ट यानाः, “इमित भिक्षु-पिथाय यंका भिक्षुणी यानाः उपसम्पन्न याय योग्य” धका धया बिज्यात् ।

प्रजापति गौतमी भिक्षुणी ‘तथास्तु’ धया लिहाँ वने घुंसेली, भगवान् बुद्धं भिक्षुपित सःताः, “भिक्षुपि ! थनि-निसं भिक्षुपिसं भिक्षुणीपित उपसम्पदा यायगु अनुमति बिये” धका उजुं दय्का बिज्यात् ।

अले प्रजापति गौतमी भिक्षुणीं इमित भिक्षुसंघे यंका विधिवत् ज्ञप्ति चतुर्थं कर्मवाक्यद्वारा उपसम्पदा यात् ।

छन्हूया दिने भिक्षुणी आश्रमे च्वनाच्वंम्ह प्रजापति गौतमी भिक्षुणीया मने छु लुलथें मस्यु, आनन्द स्थविरया-थाय वनाः सादर वन्दना यानाः थथे यिवेदन यात् :—

“भन्ते आनन्द ! भगवानयाके छगू बरदान प्रार्थना याये । व छु धासा—भगवानं भिक्षु व भिक्षुणीपिनि दध्वी थकालिया हिसाबं वन्दनादि मान आदर तय्गु नियम छगू

दय्का बिज्यात भाःसा उत्तमज्वी ।”

गीतमी भिक्षुणीया खँ न्यनाः आनन्द स्थःविरं भगवान्-  
याथाय् वनाः ध्व खँ निवेदन यात । भगवानं थथे घया  
बिज्यात :—

“आनन्द ! तथागतं मिसातेत अभिवादनादि याय्त  
अवकाश बीगु सम्भव मदु । आनन्द ! गुगु ध्व अन्य तीर्थकते  
दुराख्यातगु थासेहे मिसातेत अभिवादनादि यायगु नियम  
मदु घाःसेलि तथागतं थुकियात गथे अवकाश बी ?” ☀

भगवान्या वचन न्यनाः आनन्द स्थविरं प्रजापति  
गीतमी भिक्षुणीयात उकथं हे उत्तर बिया बिज्यात ।

आनन्द स्थविरयात थुलि घयाबिज्याना भगवानं ध्वहे  
प्रसंगे भिक्षुपित आमंत्रण यानाः थथे घया बिज्यात :—

“भिक्षुपि ! मिसातेत अभिवादनादि आदर सम्मान  
तये मज्यू, गुम्हस्यां तई वयात दुष्कृत्य आपत्ति लाई ।”

☀ अठानमेतं आनन्द अनवकासो यं तथागतो अनुजानेय्य  
मातुगामस्स अभिवादनं, पच्चुपट्टानं अञ्जलिकम्मं, सामीचिकम्मं ।  
इमेहि नाम आनन्द ! अञ्जलित्थिता दुरक्खाता धम्मा मातुगामस्स  
अभिवादनं पच्चुपट्टानं, सामीचिकम्मं न करिस्सन्ति, किमङ्ग पन  
तथागतो अनुजानिस्सति मातुगामं अभिवादनं पच्चुपट्टानं, सामीचि-  
कम्मन्ति । — भिक्खुनी विभंगे, चुल्लवग्ग ।

छन्हु प्रजापति गौतमी भिक्षुणी भगवान्याथाय वन ।  
वनाः भगवान्यात अभिवादन यानाः थथे निवेदन यात ।

“भन्ते भगवान्, गुगु नियम भिक्षु व भिक्षुणीपिनि उथें-  
ज्वी, उजोगु नियमयात जिमिसं गथे याय्गु ?”

“गौतमी ! गुगु नियम भिक्षु व भिक्षुणीपिनि उथें ज्वी,  
उगु नियमयात छिमिसं नं भिक्षुपिसं थें पालन याय्गु ?”

“अले भन्ते ! गुगु नियम भिक्षु व भिक्षुणीपिनि उथें  
मजू, उजोगु नियमयात गथे याय्गु ?

“गौतमी ! गुगु नियम भिक्षु व भिक्षुणीपिनि उथें मजू,  
उजोगु नियमयात यथा विधान थःम्हं थःम्हं पालन याय्गु ।”

### धर्मसार

पुनः छन्हुया दिने प्रजापति गौतमी भिक्षुणी भगवान्-  
याथाय वनाः अभिवादन यानाः छसिलिवक च्वन । च्वनाः  
भगवान्याके थथे प्रार्थना यात :—

“भन्ते भगवान् ! यदि छलपोलं जितः संक्षेयं धर्मोपदेश  
याना बिज्यात धाःसा जिगु कल्याण ज्वी । हानं गुगु उपदेश  
न्यनाः जि याकचा गनं छथाय् च्वनाः, उद्योग याना, अप्रमादो  
जुयाः च्वने न फे ।”

भगवानं थथे आज्ञा दय्का बिज्यात :-

“गौतमी ! गुगु धर्मयात छ— “थ्व धर्म रागपाखे  
यंकी वैराग पाखे मखु, संयोगपाखे यंकी विसंयोगपाखे मखु,

मुनेगु (संसार यात्रा बढे याइगु कारण) पाखे यंकी ममुनेगुपाखे मखु, लोभ पाखे यंकी निर्लोभपाखे मखु, असन्तोषपाखे यंकी सन्तोषपाखे मखु, पुचः पाखे यंकी एकान्तपाखे मखु आलश्य पाखे यंकी उद्योग पाखे मखु, भरण याय् थाकुपाखे यंकी भरण याय् अःपुपाखे मखु घका सी, उगु घर्मयात छं निश्चयनं थथे घका सीका काकि न व घर्म खः, न व विनय खः, न व शास्ताया शासन (उपदेश) हे खः ।

“गौतमी ! गुगु घर्मयात छं— ‘श्व घर्म वैराग्यपाखे यंकी रागपाखे मखु, विसंयोगपाखे यंकी संयोगपाखे मखु, ममुनेगुपाखे यंकी मुनेगुपाखे मखु, निर्लोभपाखे यंकी लोभपाखे मखु, सन्तोषपाखे यंकी असन्तोषपाखे मखु, एकान्तपाखे यंकी पुचःपाखे मखु, उद्योगपाखे यंकी आलस्यपाखे मखु, भरण याय् अःपुपाखे यंकी भरण याय् थाकुपाखे मखु, उगु घर्मयात छं गौतमी ! निश्चयनं सीका काकी श्वहे घर्म खः, श्वहे विनय खः, श्वहे शास्ताया शासन (उपदेश) खः ।”

श्व उपदेश न्यनाः महाप्रजापति गौतमी भिक्षुणी अर्हत जुल ।

छन्हुया दिने भिक्षुणीपिसं प्रजापति गौतमी भिक्षुणी-यात थथे निवेदन यातः—

“आर्ये ! जिपि जुलसां भगवान्या नियम मुताबिक भिक्षु संघयाथाय् उपसम्पदा जुया, छलपोल जुलसां अथे जुया बिज्यागु मडुनि, अतएव छलपोल गथे उपसम्पन्नम्ह ज्वी ?

छलपोलया आचार्यं नं मदु, उपाध्याय नं मदु ।”

ध्व खँ न्यना प्रजापति गौतमी भिक्षुणीया मने सन्देह  
जुयाः आनन्द स्थविरयाथाय् वनाः वसपोलयात थथे निवेदन  
यात :—

“भन्ते आनन्द, ध्व भिक्षुणीपिसं जितः, विधिपूर्वक  
उपसम्पन्न मजूनिगु जुया निति, उपसम्पन्न भिक्षुणी मखुनि  
धका धाल । हानं जि उपाध्याय तथा आचार्यं नं मदु हँ ।  
थुके जि छु निर्णय याय्मालि ?”

गौतमीया खँ न्यनाः आनन्द स्थवीर भगवान्याथाय्  
वनाः वन्दना यानाः छसिलिक्क फेतुत । अले आनन्द स्थविर  
गौतमी भिक्षुणीं न्यंगु खँ ब्याक्क भगवान्यात निवेदन यात ।

भगवानं, “आनन्द ! गुखुनु गौतमी महारानीं जि  
कनागु च्यागु विशेष नियमयात पालन याय्गु कराल यात,  
उखुनु निसँ हे गौतमी महारानी प्रब्रजित नं जुल उपसम्पन्न  
भिक्षुणी नं । गौतमीया उपाध्याय नं जि हे खः, आचार्यं नं  
जि हे खः । कायिकादि दुश्चरित्रं रहित जुयाः क्षीणास्रव  
ज्वीधुं म्हासिया उपरे सन्देह याय्माःगु कारण छुं मदु” धका  
धया बिज्यात ।

ध्वहे खँ आनन्द स्थविरं प्रजापति गौतमी भिक्षुणी-  
यात कनाः वसपोलया मनेच्चंगु सन्देह दूर याना सन्तुष्ट  
याना छवत ।

## न्यासल भिक्षुपित्त उपदेश

छगू समये भगवान् बुद्ध अनाथपिण्डक सेंठया जेतवन महाविहारे बिज्याना च्वन । उगु समये महाप्रजापति गीतमी भिक्षुणी न्यासल भिक्षुणीपि नाप जेतवन महाविहारे वन । वनाः भगवान्यात वन्दना यानाः थथे निवेदन यात :—

“भन्ते भगवान्, भिक्षुणीपित्त उपदेश याना बिज्याहुँ, अनुशासन याना बिज्याहुँ, धर्मया खँ कना बिज्याहुँ ।”

उगु बखते जुलसां भिक्षुपिसं पालंपाः यानाः भिक्षुणीपित्त उपदेश याइगु जुयाच्वन । उकिं भगवान् बुद्ध आनन्द स्थविरयात सःताः, “आनन्द ! भिक्षुणीपित्त उपदेश बीगुली थौं सुया पाः लानाच्वन ?” घका न्यना बिज्यात ।

आनन्द स्थविरं, “भन्ते ! नन्दक भिक्षुया पाः लाना च्वन, तर वसपोलं भिक्षुणीपित्त उपदेश बीगु मन मया” घका निवेदन यात ।

अले भगवानं नन्दकयात सम्बोधन यानाः थथे आज्ञा दय्का बिज्यात :—

“नन्दक भिक्षुणीपित्त उपदेश ब्यु, अनुशासन या, धर्मया खँ कं ।”

‘हवस’ घयाः नन्दक भिक्षु चीवर पारुपन यानाः

पात्र कयाः, श्रावस्ती नगरे भिक्षाटनया लागी बिज्यात ।  
 भिक्षाटन याय् सिधेका विहारे ल्याहां वयाः, भोजन भःपा  
 बिज्याय् सिधःसॅलि मेम्ह भिक्षु छम्ह पासा कयाः, न्हिनेपाखे  
 राजकारामे ॐ बिज्यात । राजकारामे च्वंपि भिक्षुणीपिसं  
 आयुष्मान नन्दकयात तापाकंसिं खनाः, फेत्वीत लासा व  
 तुतिसिलेत लः तयाःतल । आयुष्मान नन्दक विहारे ध्यनाः  
 ल्हो—तुति सिलाः लायातःगु आसने फेतुना बिज्यात । अले  
 विहारे च्वंपि भिक्षुणीपिसं नन्दक स्थविरयात वन्दना यानाः  
 सकलें छखेलिना फेतुत । अले आयुष्मान नन्दकं भिक्षुणीपिन्त  
 थये घया बिज्यात :—

“भो क्येहेँ मय्जुपि ! आः जि छिमिके न्यना न्यना खं  
 कने । गुगु खं छिमिसं मस्यू उकियात मस्यू घका व स्यूगुयात  
 स्यू घका घाय्माः । हानं गुगु खेँ, गुगु विषये छिमि मने  
 सन्देह इत्यादि ज्वी व खं नं जिके न्यने फक्केमाः ।”

थव खं न्यनाः भिक्षुणीपि अतिकं प्रसन्न जुल ।

अले आयुष्मान नन्दक स्थविरं भिक्षुणीपित थये घालः—

“भो क्येहेँ मय्जुपि ! छिमिगु विचारे चक्षु नित्य थें  
 च्वंला कि अनित्य थें च्वं ?”

“अनित्य भन्ते !”

“गुगु अनित्य खः, व दुःख लाकि सुख ?”

“दुःख भन्ते !”

ॐ श्रावस्ती नगरेसं च्वंगु भिक्षुणी आश्रम ।

“गुगु अनित्य, दुःख तथा हित्तुहिला वनीगु खः उक्कि-  
यात ‘ध्व जिगु खः’ ‘ध्व जि खः’ अथवा ‘ध्व जिगु आत्मा खः’  
घका भालपेगु उचित ज्वीला ?”

“ज्वी मखु भन्ते !”

“अथेसा क्यहे मय्जुपि ! गुगु ध्व भीगु मिखा, न्हाय्पं  
न्हाय्, म्ये, शरीर व चित्त खः, व नित्य लाकि अनित्य ?”

“अनित्य भन्ते !”

“गुगु अनित्य खः, व दुःख लाकि सुख ?”

“दुःख भन्ते !”

“गुगु अनित्य, दुःख तथा हित्तुहिला वनीगु खः, उक्की-  
यात ‘ध्व जिगु खः’ ‘ध्व जि खः’ अथवा ‘ध्व जिगु आत्मा खः’  
घका भालपेगु उचित ज्वीला ?”

“ज्वी मखु भन्ते !”

“अथे छाय् ?”

“छाय् घाःसा भन्ते ! न्हापा हे जिमिसं थुकियात  
प्रज्ञाद्वारा बाँलाक सीका ध्वीका तय्घुंगु दु कि ध्व आध्या-  
त्मिक वस्तु ब्याक्क अनित्य खः ।”

“साधु ! साधु !! क्येहे मय्जुपि ! सम्यक् रूपं प्रज्ञा-  
द्वारा स्वेबले, आर्य श्रावकपित थथे हे विदित ज्वी ।”

“क्येहे मय्जुपि ! गुगु ध्व भीगु रूप, शब्द, गन्ध, रस,  
स्पर्श तथा धर्म (=मनया विषय) खः, व नित्य लाकि



अनित्य ?”

“अनित्य भन्ते !”

“गुगु श्व चक्षुद्वारा सीका काइगु ज्ञान, श्रोतद्वारा सीका काइगु ज्ञान, घ्राणद्वारा सीका काइगु ज्ञान, जिह्वाद्वारा सीका काइगु ज्ञान, कायद्वारा सीका काइगु ज्ञान तथा मन-द्वारा सीका काइगु ज्ञान खः, व नित्य लाकि अनित्य ?”

“अनित्य भन्ते !”

“गुगु अनित्य, दुःख तथा हित्तुहिला वनीगु खः, उकि-यात, श्व जिगु खः, श्व जि खः, अथवा श्व जिगु आत्मा खः !” घका भालपेगु उचित ज्वीला ?”

“ज्वी मखु भन्ते !”

“अथे छाया ?”

“छाय् घाःसा भन्ते थुकियात जिमिसं न्हापाहे प्रज्ञा-द्वारा बांलाक सीका श्वीका काय् धुंगु दु कि श्व चक्षुविज्ञा-नादि बस्तु ब्याक्क अनित्य खः ।”

“साधु ! साधु !! क्यहे मय्जुपि ! सम्यकरूपं प्रज्ञा-द्वारा स्वेबले आर्यश्रावकपित थथे हे विदित ज्वी ।”

“गथे क्यहे मय्जुपि ! च्यानाच्चंगु मतया चिक अनित्य खः परिवर्तनशील खः, इता नं अनित्य खः फुनावनीगु खः, मतया ज्वाला नं अनित्य खः फुनावनीगु खः तथा मतजः नं अनित्य खः फुनावनीगु खः घका घाई । यदि क्यहे मय्जुपि !”

सुं गुम्हस्यां व च्यानाच्चवंनु मतया चिके नं, इता नं, मतया ज्वाला नं अनित्य खः फुनावनीगु खः, तर गुगु थ्व मतया जः ( = प्रकाश ) खः, व नित्य, ध्रुव, शाश्वत, फुनामवंनीगु ( अविपरिणाम धम्मा ) खः धका धाल धाःसा व खँयात उचित धाय् जीला ?”

“जि मखु भन्ते !”

“अथे छाया ?”

“छाय् धाःसा भन्ते ! गुगु व च्यानाच्चवंगु मतया चिके, इता तथा ज्वाला हे अनित्य फुनावनीगु ज्वीधुंसेलि, उकिया हे आधारं उत्पन्न ज्वीगु मतजः ला अर्थे हे अनित्य जुल !”

“अथे हे क्यहे” मय्जुपि ! यदि सुं गुम्हस्यां थ्व खुगु आध्यात्मिक आयतनयात अनित्य खः, परिवर्तन ज्वीगु खः धयाः, थ्व खुगु आध्यात्मिक आयतनया कारणं अनुभव ज्वीगु सुख, दुःख अथवा अदुःख, असुख यात नित्य, ध्रुव, शाश्वत, फुनामवंनीगु ( अविपरिणाम धम्मा ) खः धका धाल धाःसा, व खँयात उचित धाय् जीला ?”

“जी मखु भन्ते !”

“अथे छाया ?”

“छाय् धाःसा भन्ते ! छगू छगू प्रत्ययया कारणे छगू छगू वेदना उत्पन्न ज्वी । अतएव उगु उगु प्रत्यय व कारण निरोध ज्वीवं वेदना नं स्वभावतः हे निरोध ज्वी ।”

† चक्षु, श्रोत, घ्राण, जिह्वा, काय तथा मन ।

“घन्य ! घन्य !! क्यहे मय्जुपि, ठीक खः ।”

“गथे क्यहे मय्जुपि ! म्वानाच्चवंगु सारवत् सिमाया हाःनं अनित्य, मां नं अनित्य, कचात नं अनित्य, हःहि नं अनित्य तथा किपालु नं अनित्य घाई । यदि क्यहे मय्जुपि ! सुं गुम्हस्यां व सिमाया हाः, मां, कचात तथा हः-हि ब्याक्क अनित्य खःसां उक्किया किपालु अनित्य मखु घका घाल घाःसा, व खंयात उचित धाय् जीला ?”

“जी मखु भन्ते !”

“अथे छाया ?”

“छाय् घाःसा भन्ते ! व सिमाया हाः, मां, कचात तथा हः-हि हे अनित्य जूसैलि किपालु ला अथे हे अनित्य जुल ।”

“अथे हे क्यहे मय्जुपि ! यदि सुं गुम्हस्यां थ्व जिगु खुगू पिनेयागु आयतनांतु अनित्य खः, किन्तु गुगु थ्व पिनेयागु आयतनया सुख, दुःख, अदुःख व असुख वेदना खः, व नित्य, ध्रुव, शाश्वत, अविपरोत स्वभाव खः घका घाल घाःसा, व खंयात उचित धाय्जीला ?”

“जीमखु भन्ते !”

“अथे छाया ?”

“छाय् घाःसा भन्ते ! छगू छगू प्रत्यया कारणं छगू छगू वेदना उत्पन्न उवी, अतएव उगु उगु प्रत्यय व कारण निरोध

† रूप, शब्द, गन्ध, रस, स्पर्श तथा धर्म ।

ज्वीवं व वेदना नं निरोध हे ज्वी ।”

“धन्य ! धन्य !! क्यहे मय्जुपि ! ठीक खः ।”

थुगु प्रकारं नन्दक स्थविरं महाप्रजापति गीतमी महा-  
स्थविरनी सहित न्यासल भिक्षुणीपित अनेक उपमा क्यनाः,  
आध्यात्मिक व बाहिरात्मिक खुगू आयतनया बारे तथा  
न्हेगु बोध्यंगया बारे निन्हूतक उपदेश याना बिज्यातः । थ्व  
उपदेश न्यनाः न्यासल भिक्षुणीपि सकलें आर्यमार्गे आरूढ  
जुयाः अर्हत् जुया बिज्यात ।

### अग्रस्थान

उगु समये श्रावस्ती जेतवन महाविहारे, छगू छगू  
कारणं यानाः भगवानं भिक्षु तथा भिक्षुणीपित अग्रस्थान  
बिया बिज्याना च्वन । थुजागु बखते भिक्षुणीपिनि दथ्वी  
नं ‘दकसिबे पुलांम्ह भिक्षुणी सु ल्या ?’ धयागु खँ पिहाँ व-  
सेलि भगवान बुद्धं महाप्रजापति गीतमी भिक्षुणीयात  
‘भिक्षुणीपि मध्ये पुलांम्ह व सकसिबे थकालिम्ह भिक्षुणी  
प्रजापती गीतमी खः’ धका धया बिज्यात ।

थुगु प्रकारं प्रजापति गीतमी भिक्षुणी तथागत शासने  
भिक्षुणी संघया नकि जुयाः, भिक्षुणी संघया संचालन याना  
बिज्यात । जीवन काच्छि धर्मया विमुक्तिरस अनुभव याना  
बिज्यात । वसपोलं मिसाते निति भिक्षुणी शासनया लुखाद्वाः

‡म. उ. नन्दकोवाद सूत्र ।

चाय्का बिज्याःसेलि, भिक्षुणी जूर्वपि थुलिउलि धका संख्या हे मदया वन । गथे भिक्षु संघया उन्नति जुल अथे हे भिक्षुणी संघया नं उन्नति जुल ।

### कृतज्ञता

छन्हू राजकारामे चवनाः थःगु विमुक्ति सुख अनुभव याना च्वंम्ह महाप्रजापति गौतमी महास्थविरनीया मने यथे कल्पना लुल—“श्व व्याक्क निव्राण सुखया भनुभव याय् दुगु भगवान् बुद्धया हे अनुग्रहनं खः । धन्य ! धन्य !! वसपोल शाक्यसिह !”

थुकथं मतो ल्वोकाः बुद्धया प्रति कृतज्ञ जुयाः अनेक बुद्धगुण लुमंका चवन । अकि थेरोगाथाय् (६-१-६) धाःगुः—

‘बुद्धवीर नमोत्यत्थु सब्बसत्तानमुत्तम ।

यो मं दुक्खा पमोचेसि अञ्जंच बहुकं जनं ॥

सब्बं दुक्खं परिञ्जातं हेतुतण्हा विसोसिता ।

अरियट्ठङ्गिको मग्गो निरोधो फुसितो मया ॥

माता पुत्तो पिता भाता अय्यका च पुरे अहं ।

यथाभुच्चं अजानन्ती संसरीहं अनिब्बिसं ॥

विट्ठोहि मे सो भगवा अन्तिमोयं समुस्सया ।

विक्खीणो जाति संसारो नत्थिदानि पुनब्भवो ॥”

“सत्वप्राणीपि मध्ये श्रेष्ठ व बीर जुया बिज्याकम्ह,  
जितः व मेमेपि आपालं सत्वप्राणीयात दुःखं मुक्त यानाः  
बिज्याःम्ह बुद्धयात जिगु नमस्कार ।

“जि ब्याक्क दुःखयात बांलाक खंका काय् धुन, तृष्णा-  
यात मदय्कां छ्वे धुन, आर्यअष्टाङ्गिक मार्गे वनाः निर्वाण-  
पद साक्षात्कार याय् धुन ।

“न्हापा न्हापाया जन्मे जि गुबलें मां, गुबलें काय्,  
गुबलें अबु, गुबलें किजा व गुबलें आज्ञा जुये धुन । संसारया  
हेतुयात बांलाक मसिया थ्व संसार चक्रे जि आपालं चाः  
चाः हिले धुन ।

‘आः जि वसपोल शास्ताया धर्मकाययात बांलाक  
खंके धुन, जिगु थ्व जन्म अन्तिमगु खः, जन्म-मरण संसारया  
कारण ब्याक्क क्षीन ज्वी धुंकल, हानं जिगु जन्म मन्त ।’

### परिनिर्वाण--संकल्प

छन्हू प्रजापति गौतमी महास्थविरणी, सुथे भिक्षाटन  
यानाः थःगु भिक्षुणी आश्रमेसं भोजनादि याय् धुंका छथाय्  
एकान्ते च्वनाः, फलसमापत्ति आदि ध्यानसुखया अनुभव  
याना च्वन । थ्व बेलस गौतमी महास्थविरनीयात थःगु  
जीवनया खँ लुमंसि वया बडो प्रीति अनुभव जुल । थुकथं  
थःगु जीवन सम्बन्ध ध्यान विचार याना च्वच्वं वसपोलया  
चित्त थःगु आयु संस्कारपाखे वन । अले वसपोलं थःगु आयु

संस्कार फुनाच्चंगु खन । खंसेलि वसपोलं थथे मती तया  
बिज्यातः—

“आः जिगु आयु संस्कार पवीधुंकल । भगवान्याथाय्  
वनाः वसपोलया बचन कयाः, आदरणीय संघया नं बचन  
कयाः, थनसं वयाः परिनिर्वाण ज्वीमाल ।”

थथे मतीत्वोका चवंबले आका-भाकां भूमिकम्प जुल ।  
विहारे बासकयाच्चर्विं देवतापिसं दयनीयरूपं विरह यात ।  
भूकम्प जूगु खनाः ‘छु जुलथें ?’ घका विहारेच्चर्विं पासा-  
भिक्षुणीपि सकलें गौतमी महास्थविरनीयाथाय् वना, सादर  
प्रणाम यानाः, वसपालयाके थथे निवेदन यात :—

“भो आर्ये गौतमी, छाय् ल्या थौं आका-भाकां भूकम्प  
जूगु ? उखें थुखें विलाप याःगु सः नं ताय् दु ?”

भिक्षुणी पासापिनि खँ न्यनाः वसपोलं भूकम्प जूगुया  
कारण व थःम्हं मतीतुनागु खँ प्रकाश यात ।

थ्व खँ न्यनाः इपि सकल भिक्षुणीपिसं नं, “अय्सा  
आर्ये, यदि छलपोल परिनिर्वाण जुया बिज्यायगु जूसा जिपिं  
नं छलपोल नापं तुं परिनिर्वाण ज्वी” घका घाल ।

अले विहार छगुलिं शून्य ज्वीक, “गुगु थासे न जरता  
दु, न मृत्यु दु, न अप्रियगु नापं ह्वना चवनेमाःगु दु, न प्रियगु  
नापं वियोग जुयाच्चवनेमाःगु दु, उजागु असंस्कृतगु निर्वाण-

धात्वो वने त्यल' घका न्यासल भिक्षुणीपि नाप महाप्रजा-  
पति गौतमी महास्थविरनी वैशाली कूटागार विहारे  
भगवान्याथाय् बिज्यात । महास्थविरनीया परिनिर्वाण  
ज्वीगु समाचार न्यनाः अवीतरागी मनूतसें विलाप यात ।

गौतमी महास्थविरनी विहारं कूटागार विहारे बिज्याः  
बले शहरेच्चर्वापि, लंप्वो चर्वापि मनूतेसं, "गौतमी महास्थविरनी  
न्यासल भिक्षुणीपि नाप परिनिर्वाण जुया बिज्याइन्" घयागु  
खँ सियाः, "भो आर्ये, जिपि सकसितं तोता छलपोल याकः-  
चा परिनिर्वाण जुया बिज्याय्गु योग्य मजू, जिमित नं नापं  
यंका बिज्याहुँ" घका अनेक प्रकारं विरह यानाः वसपोलया  
तुतिपाली भागियात ।

विरह याना चर्वापि नर-नारीपित वसपोलं धैर्यं बिया  
बिज्यासे थथे घया बिज्यात :—

"भो मय्जुपि, शोक याये मते । विरह याये मते ।  
सन्तोष जू । भगवान्या धर्मयात जि यथार्थरूपं ध्वीकाः  
जन्ममरणया घःचां जि मुक्त ज्वी धुन । आः जिगु परिनिर्वाण  
समय न्ह्योने थ्यंकः वल । छिपि ख्वे गते । शोक याये मते ।  
सन्तोष जू । कौण्डिन्य, आनन्द, नन्द तथा राहुलादि महा-  
स्थविरपि दिन । ताकालंनिसे जि मती तयातैगु ज्या थीं  
सफल ज्वीगु जुल । थीं आनन्द माने याय्गु दिन खः ।  
छिमिसं शोक याय्मते । यदि छिमि मने जिगु उपरे दया,  
भक्ति तथा कृतज्ञता दु घयागु जूसा भगवान्या सद्धर्मं चिर-



स्थायी याय्या लागी फक्व बीर्यं यात् । जिगु प्रार्थना न्यनाः  
भगवानं मिसातेत भिक्षुणी याना बिज्यात । थुगु कारणं  
छिपिं नं जिथें हे हर्षित जुयाः जीवन सफल याय्गु सो !  
ख्वया हालां जक छुयाय् ?”

अले गौतमी महास्थविरनी भिक्षुणीपिं नापं कूटागार  
विहारे बिज्यानाः, तथागतयात सादर वन्दना यानाः थथे  
निवेदन यात :—

भो भगवान, छलपोल जिम्ह पुत्र छः, हानं छलपोल  
जिम्ह अबुजु नं खः । छाया घाःसा छलपोलया धर्म जि  
छलपोलया शासने भिक्षुणी ज्वी दत । जि छलपोलया  
भौतिक शरीरयात भरणपोषण यानाः बोलंका, छलपोलं  
जिगु धर्म-काययात शील नियम बियाः बोलंका बिज्यात ।  
जि छलपोलया केवल पलखमात्र तृष्णा निवारण ज्वीगु  
दुरू त्वंका, तर छलपोलं जितः सदां तृष्णा निवारण ज्वीगु  
शान्तगु निर्वाणरूपी दुरू त्वंका बिज्यात । जि दुरू त्वंका  
लहिना तयागुया ऋण छपिके मन्त । मिसाजातिपिसं संसारे  
मन्घाता थें जाःपिं जुजुपिनि मां घाय्केगु नं अपाय्च्व दुर्लभ  
मजू, किन्तु बुद्ध-माता घाय्के घयागु साब दुर्लभ । थौं जि  
अज्यागु दुर्लभगु 'बुद्ध-माता' नं घाय्के नंन । मनुष्य जन्मयात

† सचे मयि दया अत्थि यदि चत्थि कतञ्जुता ।

सद्धम्मट्टितिया सब्बा करोथ विरियं दल्हं ॥

—थेरी अपदान २५३

जि सार याय् धुन । आः जिगु पुनर्जन्म नं मन्त । आः जि परिनिर्वाण ज्वी त्यना कृपया जितः अनुमति बिया बिज्याहुँ । छलपोलया चक्र चींदुगु कोमल चरण छक्क नं चक्कंका बिज्याहुँ जि छक्क वन्दना याये । आः हानं जितः थुजागु सु-अवसर दै मखुत । जिगु उपरे करुणा तथा स्वीनिता लक्षणं युक्तगु छलपोलया सुवर्णमय शरीर नं दर्शन बिया बिज्याहुँ । हानं थुजागु दर्शन याय् दै मखुत भन्ते ! जि परम शान्तिपदे वनेत्यल ।”

महा प्रजापति गौतमी महास्थविरनीया अन्तिम प्रार्थना न्यनाः, तथागत सम्यक् सम्बुद्धं थःगु सुवर्णमय रूप स्वीनिता लक्षणं युक्त ज्वीक दर्शन बिया बिज्यात । प्रजापति गौतमी महास्थविरनी नं सादर वन्दना यात ।

भगवान्या श्री चरणे वन्दना यायां गौतमी महा-स्थविरनी नं थथे क्षमा प्रार्थना यातः—

“भन्ते ! जिपि मिसाजाति घयापि सर्वदोषया निदान खः, अतएव जिगु पाखें छुं दोष अथवा त्रुटि दुसा उकियात क्षमा याना बिज्याहुँ । जि छलपोलयाके बार बार जित्ति यानाः मिसाते निरिंत प्रव्रज्या पवना, यदि थुके छुं दोष दुसा जितः क्षमा याना बिज्याहुँ । छलपोलया अनुमतिद्वारा जि भिक्षुणी संघया संचालन याना, यदि उके नं छुं दोष दुसा क्षमा याना बिज्याहुँ ।”

गौतमी महास्थविरनीया खँ न्यना भगवानं थथे धया

बिज्यातः—

“भो गौतमी, गजा गजापित ला जि क्षमा बियाच्चवना घासेलि छन्त क्षमा मबीमाःगु छु दु ? हानं छ परिनिर्वाण ज्वीम्ह ज्वी धुंकल छन्त छु घाय्गु ?”

थुगु प्रकारं भगवान्याके क्षमा पवना अतिकं हर्ष जुया अने अनेगु उद्गार प्रकाश याना सकल भिक्षुपित्त नं सादर वन्दना यायां न्होनेसं बिज्याना च्वर्पि राहुल, नन्द, तथा आनन्द महास्थविरपित्त नं वन्दना याना थथे निवेदन यातः—

“ध्व नाना प्रकारया रोगं जाया च्वंगु, दोलंदो कृमि इत्यादि दुगु शरीर त्याग यानाः जि सदा—सर्वदा सुखगु परिनिर्वाणघात्वी वनेत्यल । कृपया छलपोलपिसं नं अनुमति बिया बिज्याहुँ !”

गौतमी महास्थविरनीया खं न्यना, क्षोणास्रव भिक्षुपि मकस्यां “अहो ! बुद्ध—माता नं थौं अनित्य स्वभावयात नित्त्व क्यना परम शान्तिपदे वनीन” धका अनित्य लुमंका धर्मसंवेग अनुभव याना बिज्यात । किन्तु आनन्द महास्थविर छम्ह गुम्हकि केवल स्रोतापन्नम्ह जक तिनि, मिखाय् जाय्क ख्वभि तथाः, “अहो ! गौतमी महास्थविरनी नं परिनिर्वाण ज्वीन, भगवान् शास्ता नं ताकाल मदेवं हे महापरिनिर्वाण

ज्वीगु ज्वी धुं कल” धाःधां विरह याना बिज्यातं ।

आनन्द स्थविरं विरह याना च्चंगु खना गौतमी  
महास्थविरनीनं वसपोलयात निम्नरूपं धैर्यं याना बिज्यातः—

‘भो पुत्र, यथे विलाप याना बिज्यायगु उचित मजू ।  
आःला छलपोलं भन हर्षं याना बिज्यायमाः । छलपोलया हे  
कृपां जिं निर्वाणपद प्राप्त यायु फत । छलपोलं याना तिनि  
जिपिं भिक्षुणी ज्वी दत । अकिं छलपोल यथे विरह याना  
बिज्यायमाःगु छुं महु । यथे याना बिज्यायगु बां नं मला ।  
छाय् छपिं थपाय्चकं अधीर जुया बिज्यानागु ? छलपोल  
महान पुण्यवान् खः । छलपोलया परिश्रम अवश्य सफल  
ज्वी । छिनि अनुग्रहं यानाः, तीर्थकादि आचार्यपिसं साक्षा-  
त्कार यायु मफुगु परम-शान्ति सुखया अनुभव, न्हेदं दुपि  
बालिकापिसं समेत याना काल । छलपोलया थ्व महान  
उपकारयात विश्वया नारी समाजं कदाचित लोमंके फंमखु ।  
शोक याना बिज्यायु मते, धैर्यं तया बिज्याहुं । आः जि उगु  
थासे वने, गुगु थासे वनेबले हान लिहां वये मलि मखु ।”

थुगु प्रकार गौतमी महास्थविरनी नं बुद्ध प्रमुख भिक्षु-

† आनन्दो च तदा सेखो सोकट्टो जिनवच्छलो ।

तत्थस्सुनि करोन्तो सो करुणं परिदेवति ॥

हा ! सन्ति गोतमी याति नून बुद्धोपि निब्बुति ।

गच्छति न चिरेनेव अग्गिरिव निरन्धनो ॥

—थेरी अपदान २८६-८७

संघयात वन्दना याना क्षमा फन्नने धुंसैलि, भगवान् बुद्धं  
गीतमी महास्थविरनीयात थथे उजुं दय्का विज्यातः—

“भो गीतमी, आमजागु विधिं वन्दना योय्मात्रं तथा-  
गतयात बांलाक वन्दना याःगु ज्वी मखु ।”

“भन्ते ! गुकथं याःसा भगवान् बुद्धपित वांलाक वन्दना  
याःगु ज्वीले ?”

“भो गीतमी, उत्साह याना निर्वाण वनेगु लंप्वी  
अग्रसर जुयाः उद्योग व बीर्यं याना आर्यपथे ध्यंकःवने फय्-  
केगु हे घात्थैयागु बुद्धवन्दना खः§ ।”

थुलि घया भगवानं पुनः थथे घया विज्यातः—

“भो गीतमी, छंगु विषये बांलाक मस्यूपिं स्त्रीपिं आपालं  
दु । अकिं इमि सन्देह दूर याय्त छं थःके च्वंगु ऋद्धि  
प्रातिहार्यं छक वयनाहं ।”

किंयं चरहि सब्बञ्जू वन्दितब्बा तथामता ?

कथं वन्दिया बुद्धा ? तं मे अक्खाहि पुच्छितो ॥

—थेरी अपदान-२६६

§आरद्ध विरिये पहितत्ते निच्चं दल्ह परक्कमे ।

समग्गे सावके पस्से एसा बुद्धानवन्दना ॥

—थेरी अपदान-२६७

शास्तव्या वचन न्यना गीतमी महास्थविरनी नं, तथा-  
गतया चरणे सास्तांग दण्डवत् यानाः, आकाशे आहां वना  
अनेक प्रकारया ऋद्धि प्रातिहार्यं क्यना बिज्यात । छम्ह्यां  
दोलंदो जुया क्यन । लखे न्यासि वना क्यन । पहाडे दुबिना  
क्यन । आकाशे व्वया क्यन । सूर्यया किरणयात तापुयाः  
ख्यूं से च्वंका क्यन । थुकथं दोलंदो ऋद्धि प्रातिहार्यं क्यनाः  
आकाशं ववाहां वयाः, शाक्यसिहया श्रीचरणे वन्दना याना  
छखेलिना फेतुना बिज्यात ।

थ्व ऋद्धि प्रातिहार्यं खनातिनि गीतमी महास्थविरनी,  
थुलिग्यंम्ह घका सकसिनं सिल । अलेजा काय्पिसं भन  
तसकं विलाप यात । मेमेपि भिक्षुणीपिसं नं भगवान्या  
आज्ञानुसार थःथःगु सामर्थ्यं क्यनाः आकाशं ववाहां वयाः  
भगवान्या श्रीचरणे वन्दना याना थःथःगु थासे फेतुत ।

### परिनिर्वाण

ऋद्धि प्रातिहार्यं क्यने सिधःसेलि गीतमी महास्थविर-  
नी, सकल थः परिवार भिक्षुणीपि नापं पुनः थःगु भिक्षुणी  
आरामे वना थःगु आसने छिकथं अर्द्धपर्यंक मुद्राय् च्वना  
बिज्यात ।

थुगु इले गीतमी महास्थविरनीयाथाय् बुद्ध धर्म  
श्रद्धादुपि उपासिकापि बथा बथा वयाः— मानो गोफय् वड-  
बले सिमाकच्चात चिचा-मिचादंक कुट्टं वनीथे— बे  
भोभोसुया महास्थविरनीया चरण कमले वन्दना यानाः—

“भो आर्ये, जिपिथे ज्यापि अज्ञानोतेत तोता छलपोल थपाय्चव याकनं बिज्याय् मते” धका नुगःपा दादां हाला-  
खवया विलाप यात ।

अले महाप्रजापति गौतमी महास्थविरनीनं विरह याना-  
च्वंपि उपासिकापि मध्ये प्रमुख उपासिकापिनि छ्यने ल्हा  
तयाः धैर्यं बिया बिज्यासे थथे धया बिज्यात :—

“हे मचात, गात गात ख्वे मते । ख्वयां छुयाय् ? थ्व  
मारया जाले च्वक्व बस्तु ब्याक्क अनित्य व परिवर्तनशील  
खः । धैर्यया बरू छिमिसं नं शील, समाधि व प्रज्ञा पुरे-  
थाना थ्व मारया पासं मुक्त ज्वीगु सो ।”

परिनिर्वाण ज्वीगु समय न्छोने थ्यंकः वसेलि महा-  
प्रजापति गौतमी महास्थविरनी, ध्याने च्वना बिज्यासे  
प्रथम ध्याने च्वना बिज्यात । प्रथम ध्याने च्वना अनं  
द्वितीय ध्याने, अनं तृतीय ध्याने तथा अनं चतुर्थ ध्याने  
च्वना बिज्यात । रूपावचर ध्यानं दना आकाशानन्त्याय-  
तन, विज्ञानन्त्यायतन, अकिचनन्त्यायतन, व नैवसंज्ञाना-  
संज्ञायतन ध्याने च्वना बिज्यात । अनं दना पुनः छसिनिसें  
प्रथम ध्याने बिज्यानाः, अनं पुनः चतुर्थ ध्याने च्वना  
बिज्यानाः, अनं मतः विलीन ज्वीथे परिनिर्वाण जुया  
बिज्यात । साधु ! साधु !! थुगु इले वैशाली नगरे पलख  
भूकम्प जुल ।

थुकथं वसपोल महास्थविरनी परिनिर्वाण जुया

बिज्याय घुसॅलि आकाश छगुलि गुनुनुनु ज्वोक देव बाजॅया सः तायदत । सारा नर नारीपिनि ख्वसलं याना छगू लोम-हर्षन ज्वोगु अनुभव जुल । अनेक नर-नारीपिं व देव ब्रम्हापिं सहित सकस्यां मने 'अनिच्चावत संखारा' अर्थात् अहो अनित्य ! घयागु स्मरण जुल । थुलि ज्वीव महास्थविरनो-या सहचारी भिक्षुणीपिं नं परिनिर्वाण जुल ।

पाठक पाठिका भाजु मय्जुपित जि उगु अवस्थाया कारुणिक घटनाया बयान, थ्व निर्जीव कलमं च्वये फुगु मखु । अन्तस शाक्यसिंह मुनिजुं आनन्द स्थविरयात सःता थथे आज्ञा दय्का बिज्यातः—

“आनन्द मां परिनिर्वाण जूगु समाचार आपालं भिक्षु तथा भिक्षुणीपिसं मस्युनि ज्वी । अकिं छं इपिं सकसितं सूचना ब्यु !”

अकिं थेरी अपदाने घाःगु :—

“तथा आमन्तयी सत्था आनन्दं सुतिसागरं ।  
गच्छानन्द निवेदेहि भिक्खूनं मातु निब्बुतिं ।”

अले आनन्द स्थविर, निरानन्द जुसे मिखाय् जाय्क ख्वभि तथाः, सिंह गर्जे ज्वीथे गर्जेजुयाः थासे थासे बिज्याना थथे घोषणा यात :—

“मो भगवान्या पुत्ररत्तपि, जिगु खँ छक्व न्यना



विज्याहूँ ! गुम्हस्यां भगवान् बुद्धया अन्तिम देहयात भरण-  
पोषण याना विज्यात उम्ह बुद्ध-माता महाप्रजापति गौतमी  
महास्थविरमी, सूर्धो ल्कीवं तारागण खने मदैगुथें महापरि-  
निर्वाण जुया विज्याय् धुं कल । आः थन वसपोलया केवल  
'बुद्ध-माता' धयागु नां छगू मात्र दनि । गुगु थासे वसपोल  
विज्यात, उगु थाय्यात न्यागः मिखा दुम्हस्यां हे नं खकेफैगु  
मखु । गुम्हसिया, सुगतया प्रति श्रद्धा व भक्ति दु हानं गुम्ह  
बुद्धया शिष्य खः, उर्पि सकलें वयाः बुद्ध-मातायात अन्तिम  
सत्कार या ।”

आनन्द महास्थविरया चतुर्दिशां तायहुगु घोषणा  
न्यना, तातापाक्क चर्वापि भिक्षु व भिक्षुणीपि अज थ्यंकः  
वल । गुलि थःगु ऋद्धि बलं, गुलि बुद्धया ऋद्धि प्रभावं ।

सकल उपासक उपासिकापिसं अतिकं बांलागु खत  
दय्कल । उकी दुने सुवर्णवर्णगु खाता तल । उके महाप्रजा-  
पति गौतमी महास्थविरनीया मृतदेह गोत्वीका तल । प्यम्ह  
लोकपाल देवतापिसं खतया प्यखे च्वनाः खत क्वबिल । मेपि  
देवतापिसं खतया थासे थासे ज्वनाः परिनिर्वाण जात्रा  
यात । मेमेपि भिक्षुणीपिनि मृत शरीर नं खते तयाः भोलं  
यंकल । सिथं यंकुबले अनेक प्रकारया ध्वंजा-पटाका व  
स्वांमा इत्यादिया छाय्पानं यथेष्ट दुगु जुल । आकाशं स्वां  
गाःगुथें च्वंकः लंपु छगुलि स्वां नं तोपुया च्वन । उकिसं भन  
मग-मग बास वोगु धुं, धुपाय् स्वां ज्वना देवगणपि जात्राय्  
वना च्वन । अने अनेगु बाजं थाना च्वन । प्रत्येक देव,

अशुर, नाग तथा किन्नरपिसं थःथःगु शक्ति अनुसार पूजा यात । पूजा मयासे च्चर्वि सुं प्राणीपि दुगु मखुत ।

जात्राय् (=जुलुसे) दकेन्हापां देव ब्रह्मादि नागरिकत वना च्वन । अनंलि भिक्षुणीपिनि खत । अनं महास्थविर- नीया खत । वया ल्यूल्यू श्रावकर्पि सहित भगवान् बुद्ध स्वयं विज्याना च्वन । थुजागु जात्रा ( जुलुस ) बुद्ध परिनिर्वाण समये नं मजू ज्वीः । जि च्वेनं च्वयधुन थ्व घटनास्थलया यथार्थ वयान याय्मफु ।

छगु योग्यगु थासे, नस्वा नस्वा वोगु श्रीखण्डया चिता दय्का तल । छसिनिसें जात्रा निश्चित थासे थ्यन । माःगु विधि-विधान याय् धुंसेलि मृत शरीरया खत चिताय् तथा, सकल संस्कारया परिणाम अनित्य खः धका क्यना डाह-संस्कार यात । व्याक्क शरीर मिनये धुंसेलि बाकि दुगु भति भति अस्थि भष्मावशेष कयाहति धका भगवान् बुद्ध आनन्द महास्थविरयात आज्ञा जुया विज्यात । आनन्द महा-स्थविरं भगवान्या आज्ञा न्यना पात्र जाय्क भष्मावशेष अस्थि कयाहया भगवान्यात लःल्हाना बिल । भगवानं अस्थि-पात्र ल्हाते तथाः थथे उजुं दय्का विज्यात :—

‡ बुद्धस्स परिनिब्बानं नेदिसं आसि यादिसं ।

गौतमी परिनिब्बानं अतीवच्छरियं अहु ॥

—थेरी अपदान—३६८

“भिक्षुपि ! गथे महान वृक्षया मा दयक दयक हा ल्यहे दना विनाश जुया वनी, अथेहे भिक्षुणी संघया नकि गौतमी महास्थविरनी परिनिर्वाण जुल । थथे धका जितः छुं शोक मदु । शोक सन्तापया कारण ब्याक्क निर्मूल ज्वी धुं कल । महाप्रजापति गौतमी महास्थविरनी साब पण्डितनी खः । ऋद्धि आदि अनेक अलौकिक शक्ति दुग्ह खः । हानं सर्वसंस्कारयात निर्मूल याना पुनः ल्याहाँ वय्म्वागु निर्वाणे वंम्ह नं खः । आः वया गतियात्त सुनानं सीके फेमखु । अकि भिक्षुपि ! स्वावलम्बन (अत्तदीपा) ज्वी फय्की । स्मृति-मार्गे गमन या । न्हेगु बोध्यङ्गया अभ्यास या । अले छिमिसं नं दुःखया अन्त याय् फई ।”

अत्तदीपा ततो होथ सतिपट्टान गोचरा ।

भावेत्वा सत्तबोज्जंगे दुक्खस्सन्तं करिस्सथ\* ॥

साधु ! साधु !! साधु !!!



## लेखकया मेगु सफुत

गृही-विनय (द्वितीयावृत्ति)	...	११
घम्मपद (द्वितीयावृत्ति)	१७० ... सजिल्द	१९८
कर्मविभाग	...	१२४
आर्यसत्य	---	११६
त्रिरत्न वन्दना (तृतीयावृत्ति)	...	१२४
घम्मपददुक्कथा	३१५० ... सजिल्द	४१५०
ज्ञानमाला (चतुर्थावृत्ति)	...	१७५
पाठसूत्र	...	१३६
बुद्ध जीवनी	...	११
धर्म व विनय	...	१३६
जातकमाला भाग-१	...	१५०
जातकमाला भाग-२	...	१७५
अग्रश्रावक	...	१२०
महास्वप्न जातक	...	१२५
सर्वज्ञ धातु	...	१२०
अग्रश्रावक ( राष्ट्र भाषा )	...	१२०
घम्मपद " "	...	१५०
वेस्सन्तर जातक	...	११

बुद्धकालीन ब्राम्हण	भाग १ ( पृष्ठ ५०४ )	७१-
" गृहस्थीहरू	" १ ( " ५८१ )	८१-
" राजपरिवार	भाग १ ( " ६६५ )	१०१-
" महिलाहरू	भाग १ ( " ५५६ )	८१-
" परिव्राजकहरू	भाग १ ( " ७९६ )	१६१-
" श्रावक चरित	भाग १ ( " ३७८ )	६१-
" श्राविका "	भाग १ ( " १००५ )	२२१-
" ब्रम्हादिदेव	भाग १ ( " ६६८ )	१८१-
" प्रेतकथा	( " ३८२ )	१०१-
" विमानकथा	( " ४०४ )	१२१-
" ब्राम्हण	भाग २ ( " ६०० )	१५१-
" दशैवटा ग्रन्थहरूको विषय सूचि		५१-
" ब्राम्हण	भाग ३ ( " ६८० )	१७१-
" गृहस्थीहरू	भाग २ ( " ६०० )	१५१-

Dhamma.Digital

सफू देगु थाय् :-

- १) आनन्दकुटी विहार, स्वयम्भू
- २) श्री हेराकाजी मुजिका. नागबहाल, ललितपुर ।

---

मुद्रक:- सुभाष प्रिन्टिङ्ग प्रेस, ल. पु. नकवहिल फोन : २१-१६१